

萬 有 文 庫

第 二 集 七 百 種


王 雲 五 主 編

洪 北 江 詩 文 集

(五)

洪 亮 吉 撰

商 務 印 書 館 發 行



洪北江詩文集

(一)

洪亮吉撰

國學基本叢書

更生齋詩卷第一

萬里荷戈集

八月二十七日請室中始聞遣戍伊犁之命出獄紀恩二首

暫離三木卽身輕。忽綴戎後隊行。那彥成尙書奉命往陝西軍營參贊亦于是日率京兵啓行。天上玉堂虛想像。道邊金甲尙縱橫。

預知前路應長往。從此餘年號更生。穩臥側輪車畔好。員扉幾夕夢難成。

已作孤兒三十春。道旁今更泣孤臣。全軀自感君恩厚。對簿偏忘獄吏尊。人笑冷官罹法網。天教熱血灑邊塵。受知兩度真逾次。未散館卽簡任學政及入直內廷皆屬異數。敢向閑中惜此身。

蘆溝橋口占贈張吉士惠言并寄同館諸君子

張君本同里故交。今歲五月。余蒙恩派教習庶吉士。張君適在其內。執弟子之禮甚恭。余不敢當也。其餘諸君亦竝絡繹出送致贖。故作此致意云爾。

春明門外駐征輪。簪笏同來唁逐臣。我視黃州已僥倖。綴行相送較情親。

出嘉峪關僱長行車二輛。車箱高過于屋。偶題一絕。

持燈行三更。鞭屋行萬里。削雪正欲烹。一星生釜底。

出關作

半生蹤跡未曾閒。五岳遊完鬢乍斑。卻出長城萬餘里。東西南北盡天山。

抵玉門縣

萬餘里外尋鄉郡。余家郡望敦煌三十年前夢玉關。余弱冠時在天井巷汪宅課甥曾夜夢至天山詳見所著天山客話絕笑班超老從事。欲從遲

莫想生還。

安西道中

萬古飛難盡。天山雪與沙。怪風生窟穴。戰地絕蓬麻。野戍年將換。穹廬日不華。仍從候人問。恐有路三叉。

疏勒泉

一水懸天上。遙知疏勒泉。浴波童類鶴。剝岸屋如船。齒髮衝冰墮。功名養弩傳。從戎本吾願。前路莫漚然。

安西至格子墩道中紀事

我行發安西。十日五停軸。疲蹤本思憇。所苦乏室屋。兼之山萬仞。不貯水一掬。狂風飛牛羊。往往集空谷。

三更寒霧重。馬足植如木。乞火爇束薪。言依囊佗腹。

此日風候嘉。殘漏行百里。荒荒紅一綫。日出土囊底。嚴程原有限。沙磧從此起。來從天山頭。去向天山尾。

沙深行旅斷。見客心輒喜。泥漿藏破甕。到口甘若醴。飲馬投百錢。喧聲尙難已。

偶逢陳世昌。曾令楚邊邑。殺賊爲賊縛。荷戈來百驛。三歲得減徒。庶幾歸有日。班荆相慰藉。反致淚嗚咽。一妻前被殺。兩子致殘疾。生還雖可樂。奈已乏家室。東望嘉峪關。中懷慘如結。

林鳥大如犬。兀傲不避人。攫肉翔道旁。足蹴十丈塵。居民半焦黑。人鬼固不分。出穴競往來。半雜鷄與豚。襍被何處棲。爬抉沙石根。不然升高原。廟古依土神。

天山歌

地脈至此斷。天山已包天。日月何處棲。總挂青松巔。窮冬棱棱朔風裂。雪復包山沒。山骨峰形積古誰得窺。上有鴻濛萬年雪。天山之石綠如玉。雪與石光皆染綠。半空石墮冰忽開。對面居然落飛瀑。青松岡頭鼠陸梁。一一競欲餐天光。恣林弱雉飛不起。經月飽啖松花香。人行山口雪沒蹤。山腹久已藏春風。始知靈境迥然異。氣候頓與三霄通。我謂長城不須築。此險天教限沙漠。山南山北爾許長。瀚海黃河茲起伏。他時逐客倘得還。置冢亦象祁連山。控弦縱遜票騎霍。投筆或似扶風班。別家近已忘年載。日出滄溟倘家在。連峯偶一望東南。雲氣濛濛生腹背。九州我昔歷險夷。五岳頂上都標題。南條北條等閒耳。太乙太室輸此奇。君不見奇鍾塞外天奚取。風力吹人猛飛舉。一峯缺處補一雲。人欲出山雲不許。

進南山口

一峯西來塞官路。峯頭一峯復回互。人疲馬嬾亦少休。雲外飛橋落無數。山坳路古盤如綫。卻向林梢瞰

遙甸一片伊吾曉日華。黃金世界空中現。

下天山口大雪

危峯北去高無際。過嶺風聲水聲異。鞭梢拂處險接天。風勢吹人欲離地。千峯萬峯迷所向。意外公然欲相抗。雲頭直下馬亦驚。白玉闌干八千丈。

松樹塘道中

馬定知人意。穿松屈曲行。漸忘遷客感。足慰看山情。閱世心俱寂。聽泉夢亦清。林威丈人約。何日許將迎。

松樹塘萬松歌

千峯萬峯同一峯。峯盡削立無蒙茸。千松萬松同一松。榦悉直上無回容。一峯雲青一峯白。青尙籠烟白凝雪。一松梢紅一松墨。墨欲成霖赤迎日。無峯無松松必奇。無松無雲雲必飛。峯勢南北松東西。松影向背雲高低。有時一峯承一屋。屋下一松仍覆谷。天光雲光四時綠。風聲泉聲一隅足。我疑黃河瀚海地脈通。何以戈壁千里非青葱。不爾地脈貢潤合作天山松。松榦怪底一一直透星辰宮。好奇狂客忽至此。大笑一呼忘九死。看峯前行馬蹄駛。欲到青松盡頭止。

菩薩溝道中

天山南北口。百里積冰雪。歲晚不逢人。牛羊伴除夕。

山隅一兩家。早已閉門宿。空明北斗光。穹廡代然燭。

齒髮能旋里。應知亦主恩。

時值有江西誠徒回里者帶同戍人齒髮歸里

仍憐異鄉久。魂怯玉關門。

此水酌一滴。永清人世心。臨流莫相照。聞說鬢毛侵。

廿八日抵巴里坤

南山高瞰城。下復裂深谷。巉巖千丈堞。排齒入山腹。晴天飛雪霰。卽已沒車軸。陰寒中人深。肩背苦瑟縮。

千年留戰地。往往鬼夜哭。年殘風益暴。客至裏重幄。燈火集一城。宵驚燭光綠。

除夕巴里坤客帳祀先

昔日公孫瓚。臨岐祀北邙。潛然感先德。忘卻在殊鄉。燭借穹廡火。牲求牧澤羊。荒寒一甌雪。聊抵奠椒漿。

除夕夜坐

世緣應已盡。夢亦不還家。別有關心處。偏忘去路賒。幾行墳樹影。千疊隴雲遮。他日能歸骨。從親傍水涯。

鎮西元日

兩日松塘走急程。亂雲開處出邊城。奔馳萬二千餘里。來聽鄰雞第一聲。

殊方都喜說新年。板屋斜欹彩勝偏。一事暫教鄉思緩。家家門巷有秋千。

逢人入關卽寄胡安西紀謨楊靈州芳燦莊邠州忻錢華州拈四刺史

何處能尋遷客蹤。車箱眠已過三冬。聊烹太古荒寒雪。盡洗平時磊落胸。人說更生同子政。我慚行殯學山松。心交海內今餘幾。呵凍裁書手自封。

覆車行

風漫天。雪逼夜。匹馬隻輪。馳至山下。驚沙撲馬。馬忽奔。削徑倒下。先摧輪。車箱壓馬。馬壓人。馬足祇向人頭伸。身經竄。逐死非枉。只惜同行僕。无妄驚魂乍定。忽自疑。奔車之上。無伯夷。

肋巴泉夜起冒雪行

北風排南山。山足亦微動。寒光亘千尺。壁立雪若衝。車箱沁肌骨。清絕無一夢。更殘欣出穴。飛白壓衣重。百里僅數家。山房疊成盃。相將依爨火。漿濁感分送。人氣亦少蘇。無如馬蹄凍。

人日白山道中

三載逢人日。驚心客鬼方。謂在貴州學使任今來遷客夢。仍阻亂山旁。莽莽沙如雪。勞勞鬢已霜。居人能尙義。猶

饋束脩羊。逆旅主人子將授經。屬余爲分句讀。

自白山至噶順

嚶嚶蕭蕭徹五更。狗亦不吠雞不鳴。車箱縮項凍欲死。誰復料理征人行。忽然破屋晴光出。湧得天山一輪日。疲羸嘶風馬亦奮。踏雪兼程到噶順。

發大石頭汛

天山界畫分半空。白雪自白雲光紅。馬蹄斜上雪飛盡。衣袂飄入雲當中。連峯中斷郵亭壞。此是奇台鎮。西界平沙日午捲。北風數點牛羊落天外。

烏蘭烏素道次

烏蘭以北地不毛。極視千里無秋毫。窮荒烏亦拙生計。啄土飲雪居無巢。居人覲面能欺客。獸復欺人占居宅。健兒彎弓射不得。空手歸來氣填臆。

初八日乘月行四十里至三個泉宿

人煙百里何渺茫。疲羸獨行古戰場。高天下地總一色。明月白雪分清光。拂眉時有山禽過。清獻聲高野禽和。三泉屈指尙半程。我倦欲從雲外臥。

古城逢立春

短轅車逐短衣人。萬里來尋塞上春。識路未應呼老馬。岐塗先已泣孤臣。雲邊一笛驚殘夢。天外三山伴此身。肯把障泥容易澣。就中猶有帝京塵。

鷹攬羝行

一山巉巖忽裂口。千羊萬羊出其竇。羊羣居前牛在後。鷹忽飛來攬羝走。羣羊哀鳴牛亦吼。北巷南村集

羣狗鷹攫羝飛勢偏陡。雲中健兒弓已拓。一箭穿雲覺雲薄。羊毛灑空鷹爪縮。天半紅雲尙凝蹙。
牛觸冰行

天山十丈冰稜大。牛角觸冰冰欲破。牛向冰稜窟中墮。馬車西來不能過。三馬曳牛牛尙坐。道旁田夫添
十個。索曳牛蹄角先挫。須臾冰陷牛方出一角已從冰上折。牧童驅牛不敢叱。更裂氈裳裹牛血。
夜抵木壘河

到得山村夜已迷。窗櫺全不辨東西。狼馴似馬憑鞭策。鵠大于雞共樹棲。穴鼠岸然欺客睡。壑猿時復雜
兒啼。峯峯塞路誰能究。只覺檐前北斗低。

早發四十里井寒甚。路人有墮指者。

極天惟有雪。萬古不開山。祇覺雲生滅。從無鳥往還。路人傷墮指。遷客屢摧顏。倘有攀躋處。思排虎豹關。
元夕過阜康縣七十里宿黑溝

君恩應已重。不敢更思鄉。卽此逢元夕。先忘在遠方。話愁惟對影。與僕互傾觴。兒女雖相憶。何由識阜康。
黑溝步月

邊庭昨日已東風。寶鴨頻添雪乍融。一晌春人夢魂膩。焉支坡上月先紅。
五家村裏獨裴回。奇絕峯巒面面開。三百臺它燈一盞。夜深偷渡黑溝來。

安濟海夜起

夜闌安濟海。波焰燭天紅。迴異雲霞色。都疑神火烘。松杉開嶺末。烏鵲繞圍中。待得雞頻唱。關門日始東。自烏蘭烏素至安濟海。雪皆盈丈十餘日。不見寸土。因縱筆作。

烏蘭烏素迄安濟。十日見天不見地。有時天亦被雪遮。天與雪光原不異。惟交日午與月午。日月破空光獨麗。阜雕如鵬排齒舞。黑蜨象龍交角戲。雙峯獨峯駝背闊。三角乙角羊頭細。家牛漣乳酪尤厚。埜雉作羹膏過膩。冰厓倏爾超百仞。雪窟不須分四季。狹哉豎亥東西步。笑絕唐虞朔南暨。漢家亦僅開張掖。惹得控弦益無忌。何如聖世中外一。并斷匈奴左邊臂。南庭北庭幕已空。陽關玉關門不閉。二千餘年方拓壤。三十六國皆請吏。尤欣棲畝盡軍食。不爾闢疆虧國計。溫都斯坦布魯特。退木爾沙哈拉替。修眉羅刹久作汗。戴角博羅都號比。羣驅羊馬作互市。從此番回悉衣被。賜之瑰麗手加額。日以酋豪頭戴髻。昆命去天纔咫尺。日月藉此相隱蔽。金銀臺殿誰得過。我欲乘風縱遊轡。渾河入地波乍洌。熱海逼冬泉亦沸。山傾西北悉破碎。河界天人此分際。張騫鑿空乃得到。伯益躡實何其諦。荒寒近始遭挾剔。神妙誰能復思議。元霜更在昆岡外。手握龜蛇出人意。只憐我亦老史臣。振筆欲增西域記。會看拓地過西海。不使羣生有殊氣。閩船已具千百艘。宛馬益多三萬騎。寒門銅柱親勒銘。功德高于百王帝。贈呼圖壁巡檢沈仁澍。

如何遠宦經三徙。君從闕展調署濟木薩丞又調署呼圖壁。僅比流人近十程。同向瞭高臺上立。欲從何處望江城。

三臺阻雪

北風吹雪入鬼門。風定雪已埋全村。村人鑿穴透光景。百尺稜稜瞰樓頂。燒松作炭雪不消。反使石穴全身焦。征人停車已三日。雪穴驚看馬牛出。平明一綫陽光開。烏鵲就暖皆飛來。征人欲行馬瑟縮。冰大如船復當谷。

發二臺

看山不厭馬蹄遙。笠影都從雲外飄。一道驚流直如箭。東西二十七飛橋。

行至頭臺雪益甚

天山雪花大如席。一朵雪鋪牛背白。尋常雞犬見亦驚。避雪不啻雷與霆。幾家房廊陷成井。百丈青松沒松頂。警驚一騎去若飛。雪不沒髀風生蹄。東風乍停北風起。驅雪松濤十餘里。松柴燒赤老瓦盆。奇冷更變成奇溫。

蘆草溝

蘆草溝邊路。茫茫日欲昏。堅冰截南北。空白合乾坤。馬避千人集。雅啼獨樹村。車箱夢疇昔。聊足慰羈魂。

伊犁紀事詩四十二首

城西乞得暫勾留。到日將軍派居城西別墅中。何止逃喧亦避讐。只覺醫方有奇效。閉門先學陸忠州。

橐筆頻年上玉墀。虎賁三百笑舒遲。書生亦有伸眉日。獨跨長刀萬里馳。廢員見將軍例佩刀長蹕。

環碧軒中祟不迷。僅餘風柝雨淒淒。固知此老迂難近。絕勝宵分咒準提。余寓齋相傳有魅。全太守士潮居之每為所黷。夜分輒誦準提

咒然不能禁也。余未至前數日鄰童夢魅已移去。

到日先傳領督催。無端堂帖復追回。余到日初派督催處行走後又改派册房閒心檢點流入册。根觸西川御史臺。余檢點舊事見御史

李玉鳴年貌册故及之。

熟客先驚問姓名。記曾躍馬入咸京。當時書記疎狂甚。親屈元戎作騎兵。謂張總兵廷彥。余辛丑歲客西安節署。張時尙在撫標學習。親

導至曲江鏡看花。

誰跨明駝天半回。傳呼布魯特人來。牛羊十萬鞭驅至。三日城西路不開。布魯特每年驅牛羊及哈拉明鏡等物至惠遠城互市。

已分從公老牧羊。門生家世本敦煌。金丹五百題容緩。臨行屬篆金丹五百字。先獻麻姑禁酒方。房師王荔園先生官湖北安襄鄖道。

以軍興法先遣戍伊犁。在將軍署課讀飲酒時或過量。故未語規及之。

畢竟誰驅澗底龍。高低行雨忽無蹤。危厓飛起千年石。壓倒南山合抱松。伊犁大風每至飛石拔木。

日日衝泥掃落苔。一條春巷八門開。鼓樓北有八家巷。屋宇街道極修整。外臺自有蕭閒法。謂廉使德泰乞余書堂額云蕭閒外舍。攜具方家

說餅來。方兵備受疇製餅極佳。與廉使對門。每邀余飯。則兩人合治具。

坐來八尺馬如龍。演武堂高夾路松。謫吏一邊三十六。盡排長戟壯軍容。四月一日。隨將軍演武場。角射時。廢員共七十二人。
鑿得冰梯向北開。陰厓白晝鬼徘徊。萬叢燐火思偷渡。盡附牛羊角上來。冰山為伊犁。適葉爾羌要道。常撥回戶二十人。日鑿冰梯。以通

人行

古廟東西闢廣場。雪消齊露粉紅牆。風光穀雨尤奇麗。蘋果花開雀舌香。

城隅兩日霽寒威。韋曲詞人尙下幃。謂韋大令佩金。趁得南山風日好。望河樓下踏春歸。惠遠城南有望河樓。面伊江為一方之勝。

幽絕城西半畝宮。古垣迤北盡長松。危樓不用枯僧上。罔兩時時代打鐘。西城外有古廟。常白晝見罔兩。迷人無敢入廟者。

百輩都推食品工。剪蔬饒復有鄉風。銅盤炙得花豬好。端正仍如路侍中。同里趙上舍炳。先以事戍伊犁。今館于綏定城。食品最工。燒花

尤美。

甌脫宵寒忽異常。行轅門外橐它僵。堂期縱過天中節。明日仍冠骨種羊。將軍一月內。以二五八為堂期。諸廢員咸入辦事。又伊犁夏日

節換季後。每天寒則仍帶暖帽。

遊蜂蛺蝶競尋芳。花事初紅菜甲黃。只有塞垣春燕苦。一生不及見雕梁。春燕皆巢土室中。

一卷平臺紀事功。十年循吏說宏農。楊廉使廷理。曾官臺灣。知府。預平林爽。文等著平。臺紀事二卷。時屬余。點定。廉使在閩中。最有政聲。便同海外奇書讀。

腹痛還思邴曼容。內有紀吾友湯大令。大奎死節事。

城西連日雨昏黃。急溜先傾羊馬牆。夜半老兵驚起叫。阜鷗如虎撲人忙。

萬死方來西海頭。別司鎖鑰領兜牟。謂張太守風枝。時派管軍器庫。南中老守疎狂甚。尙憶東風燕子樓。太守有一妾。留

時憶及之。

將軍昨日射黃羊。親爲番王進一湯。時哈薩克王子以承襲。王爵來謝。因照例設宴。百手盡從空裏舉。更憑通事貢真香。外番以

貴有所敬。則獻之。

芒種才過雪不霏。伊犁河外草初肥。生駒步步行難穩。恐有蛇從鼻觀飛。伊犁南山下有異蛇一種。遇驢

腦隨馬遇之。無不立死。

黃泥牆北打門頻。白髮來辭喜氣新。謂開鎮臺九紋以前四月奉。恩旨釋回。至四川軍營効力。卻買鮮魚飼花鴨。伊犁鵝鴨必以鮮魚飼之。乃肥。商量

明日餞歸人。

伏流百尺水潺湲。地勢斜衝北斗垣。高出長安一千里。故應雷雨在平原。伊犁地形高出西安八百餘里。

生羌一月病彌留。夜半魂歸戶不收。忽變驢鳴出門去。郭橋何似板橋頭。二月中有生羌居北關外。將死。忽變爲驢。惟一足未化。人皆見之。

偶選龍媒貢上方。萬蹄如鐵剖河梁。驂騑盡解如人立。環拱將軍下角場。

鵝鳴啼處卻東風。宛與江南氣候同。杏子乍青桑甚紫。家家樹上有黃童。伊犁桑甚極美。白者尤佳。

纍臣百計遣秋光。學圃年來寢有方。蒔得菊花三百本。歸家亭子宴重陽。歸方伯景照善蒔菊。每

年以重陽前後宴客。

窮荒連月有恩綸。邊雨初晴塞艸春。昨午北郊迎詔使。分明捧日兩黃人。純皇帝升祔詔使到日雨適霽余隨將軍出北郭恭送

怪風時起撲燈蛾。舊燕巢欹鼠作窠。蒸得春蚊大如斗。南山溼霧入簾多。

老饕到此已無緣。且減常餐汲井泉。十日齋廚冷于寺。故應蔬味勝腥羶。

達板偷從宵半過。箏琵琶竹響偏多。不知百丈冰山底。誰製齊梁子夜歌。夜過冰山者每聞下有絲竹之聲又聞有唱子夜歌者莫測其

奇也

籬豆花紅薜葉班。時時約客話更闌。齋廚百品多嘗徧。惜少山雌入食單。陳巡撫淮食品絕精聞秋冬間燒雉尤美惜不及食之

山溝六月曉霞蒸。百果皆從筵上升。買得塔園瓜五色。溫都斯坦玉盤承。果子溝至六月百果方熟伊犁北郭外滿洲駐防塔章京園內

有五色瓜溫都坦製玉盤孟等極精伊犁亦時有之

偶向尊前學楚歌。天涯誰識故人多。郎官湖水清如鏡。絕憶三更放棹過。癸卯秋余自西安歸過漢陽族姪聖也邀余夜遊郎官湖時廉

使德泰為漢陽守亦在座余已不記憶矣及至此廉使話及之

五月天山雪水來。城門橋下響如雷。南衢北巷零星甚。卻倩河流界畫開。四月以後即引水入城街巷皆滿人家間作曲池以蓄之至八

九月始涸

戟門東去水潺湲。山色周遭柳作垣。日昃馬行三十里。納涼須駐會芳園。會芳園在綏定城總兵署後極幽爽

待得城樓月欲升。竟攜茶具就書燈。九朝舊事無人聽。只有西廳老郡丞。官無一合者惟最重余又留心

國朝舊事。以余歷直內廷諸館。頗諳掌故。每夜輒攜果餌等物就訪。乞余爲說九朝事蹟。恒傾聽不倦。

結客城南緩步回。水雲寬處浪如雷。昨宵一雨渾河長。十萬魚皆擁甲來。

伊犁河魚極多。皆無鱗而皮厚如甲。

一句胡蝶已成團。便擬開筵宴謫官。攜得百花洲畔法。種來鷺粟大如盤。

陳巡撫寓齋鷺粟獨盛。有五色如盤者。蓋江西所攜來之種。擬

分日宴客。

積雨冥濛路不開。巒岈歷盡始三臺。萬松怪底都相識。曾向童年入夢來。

雪深纔出玉門關。三月君恩已賜環。贏得番回道旁看。爭傳李白夜郎還。

行抵伊犁追憶道中聞見率賦六首

嘉峪關前夕霧收。布隆吉後曉星浮。馬毛作雪明千里。龍氣成雲暗一州。冰谷對床聲乍噤。火山當戶汗

仍流。平生每厭塵寰窄。天外如今一舉頭。

黃羊如織馬如梭。託命三更有駱駝。闢展尾疑通地穴。巨靈手竟握天河。松杉條爾垂行幄。魍魅居然避

荷戈。行到路岐偏認取。卅年前記夢中過。

背可施鞍鼻可牽。衆生疑鬼亦疑仙。地幽古佛皆穿耳。月朔新蟾已抱肩。

初一日即見新月。

厄魯特魚紅有影。俄

羅斯馬白無邊。流沙萬里傳書少。且續夷堅海外篇。

總是非非想處來。見聞無用更驚猜。人如混沌何嘗鑿。天似鴻濛乍欲開。日月偶搏空外影。塵沙都認劫

前灰山魍獨足蛇岐首。盡咒征夫去不回。

烏弋烏孫視陝西。九天九地判高低。下飄鬼國須浮楫。上瞰神霄若有梯。湯谷沸波今未改。寒門標柱古

誰稽。流聞何止征和碣。伊犁相傳有張鶩石碣徧訪未之見尙詡倉公四目題。

莫笑書生一召弓。置身十萬健兒中。雲烟氣總歸西海。弧矢音皆中北風。跡隸伍符慙百戶。階崇都護壓

三公。將軍位在蒙古王公上逐臣自問難酬德。且學張騫事鑿空。

附題萬里荷戈集諸友人詩。以得詩前
後爲次

黃聘三閩縣

忠言讜論壯朝班。能得君心忽解顏。臣罪當誅寬斧鑕。聖恩過厚賜刀環。賈生猶待三年召。韓愈何曾
百日還。青簡留題光奕奕。明良聲問重如山。

韋佩金江都

莫作逐隊鴉。百千爲羣散風花。須爲鳴岡鳳。忠孝會使文章重。投書樞府帝曰吁。容臣愚。不殺軀。覽書
丙夜帝曰俞。鑿心孤。戍名除。嘉慶五年閏在夏。擊鼓鞞鞞詔書下。將軍轅門馳匹馬。趨跪當階聽宣赦。
西海九死臣。伏地不起放聲悲。堯仁覆載廣舜哲。日月輝。遭逢如此隕無恨。豈在一人留與歸。作餞不
爲君設酒。折贈不爲君折柳。聖人解網羣生宥。中外騰頌主恩厚。道旁感嘆泣稽首。

陳 淮尚丘

結托十載前。已識才如斗。何期故鄉人。翻遇雪山口。諫艸動萬言。樸誠真不朽。直有回天力。堪稱救世手。鎔經與鑄史。莫不欽抱負。荷戈來伊江。閉門斷詩酒。雷霆間雨露。總沐主恩厚。既不受人憐。豈肯隨人走。委心任去留。東歸瞻馬首。煌煌天語頒。一德洵非偶。以上三人同在伊犁戍所。

顧 揆金匱

天祿藏書幾費詮。逍遙暫作地行仙。先憂早裕昇平業。後會都成歡喜緣。域外扶輪推大雅。馬前揮筆著新編。銘留御座輝煌甚。片札應同刀劍傳。

張騫碣下拜恩殊。聖德如天重碩儒。文字直堪追漢魏。遭逢更喜邁韓蘇。吟懷朗映三秋月。飲量汪涵萬頃湖。他日廬陵訂詩史。可容祕演學浮屠。時戍烏魯木齊。

楊芳燦長洲

蘭山話別各傷神。浩蕩冰天逐雁臣。幸免若盧收杜衆。還愁樂浪竄崔駟。孤蹤判作長流客。溫語旋迴絕塞春。開盡桃花消盡雪。兩行紅柳送歸人。雞竿詔向九天頒。鄭重君恩特賜環。傳到好音先破涕。懸知小別未催顏。朝搜斷碣窮沙磧。夜聽清笳度雪山。萬里只如庭戶近。軺車聊當採風還。

上書慷慨沾名。願效涓埃答聖明。宣室舊曾徵賈傅。讜言今已念班生。親知預擬聯裙屐。邊徼行看洗甲兵。見買夫須營釣艇。滄江穩臥頌昇平。

湖山佳處儘相羊。蟹舍魚邨認故鄉。築室且教泥水蔽。著書合付子孫藏。羈魂恐尙依銅柱。溫都斯坦有堯時銅柱。相傳塞外人死者皆歸之。如中國之岱宗云。歸夢時應到玉堂。愧我浮沉銷志節。白頭顏駟乞爲郎。

莊 忻武進

聖主由來宥直臣。投荒旋見作歸人。重逢隴首飛黃葉。此去江南采白蘋。飲酒無多消歲序。吟詩何益費精神。扁舟我亦如張翰。相訪城東月色新。

曾 煥南城

聖主求言量獨宏。謗書宣示舉朝驚。竟將忠愛憐蘇軾。不許公卿害賈生。絕塞烏頭三月白。歸裝駝背一編輕。旁觀猶感君恩重。何況親爲雪窖行。

孫星衍陽湖

秉燭論心已有期。尊前霜鬢認依稀。我傷駒隙三年速。君自龍沙萬里歸。折檻風流成盛節。埋輪心事有危機。龜在山左。幾爲附朝貴者所中傷。不知此後方元白。可仗文章定是非。前尊詩有偶讀開成太傅詩七年。我亦長微之之作。故此句及之。

趙懷玉武進

青楓林外擬招魂。此日居然入玉門。詔下已聞伸士氣。身留何以答君恩。可能詩酒捐狂態。想見妻孥拭淚痕。氛祲未消雲漢皎。時久幾人封事爲時論。

錢伯坳武進

山峻嶒兮崩劣。雪瀰漫兮際天白。朝不見日出兮。暮胡然而止息。荷戈者誰子。度沙漠兮。不知其幾萬里。莽寥廓兮。寄生死。落彼大荒。竄跡牛與羊。大府特兀凌穹蒼。旌旗雲日。刀劍光。將軍使相曰。中堂屹然坐堂皇。叱聲階下走。小臣帖身受。汝何獲罪聖天子。天子宥汝以不死。但當墊伏窮三冬。敢攫詩酒號寒蟲。翰林卑躬執廝役。帶刀跨馬前趨風。皇輿隆覆載。此日西域界。是罪人所徙。西盡日所曬。張騫鑿空疑不到。鄒衍空談九州外。聞搜聞見落中華。地志山經補其隘。忽然中堂宣拜舞。丹詔煌煌奉天語。賈生仍遣洛陽歸。小臣涕泣紛如雨。是能先幾翊萬幾。且將座右箴其辭。大哉王言詔中外。八荒共慶天無私。昔年身向圖中去。關門一閉入朝天路。今日生還作畫看。謹誌君恩不忘處。歷聖相承二百年。吾鄉清節幾人賢。妙筆生涯拓君手。畢幼安高士也。實寫此圖。壯哉斯圖洵不朽。

楊嵎谷武進

六合誰能賦。千秋獨占難。高岑纔塞上。燕許只臺端。更關詩中界。還馳域外觀。書生空胸縮。武士但糾桓。健者今詞伯。風騷主敦盤。臚雲登上第。起草擬如干。葑菲辭誠過。芻蕘慮畢殫。無私天鑒近。不殺聖

恩寬慷慨行何畏。頭顱亦早拚。壯懷輕萬里。祖帳揖千官。遠戍提長戟。輕裝衣短襦。雄關出嘉峪。中土隔騰蘭。赤陂陰常燄。平沙井亦智。大風掀濤濤。古雪積蠻岼。險阻勞筋骨。荒涼沁肺肝。只疑天欲盡。不道路猶漫。所仗惟忠信。如飛得羽翰。烏孫傳舊部。虎將築新壇。乍到名編籍。先驅背負簫。空房鎮宵魅。軍府對南冠。履尾凶將啞。吞羶強勸餐。愆尤悔山積。感激涕洟瀾。舞劍霜華滿。聞笳月魄闌。敢懷歸井邑。長夢侍金鑾。豈料烏頭白。真噓黍谷寒。炎峴分玉石。集泮別鴛鸞。特旨從原有。危言策治安。賜環裘葛換。匹騎往來單。雙足重添趼。千山慣據鞍。自來原鐵漢。服食謝金丹。定遠生仍入。終軍吏不攔。眼中風景舊。歸後髮膚完。慈訓三遷里。才名百尺竿。胸全羅列宿。腹稍露琅玕。威鳳終巢閣。孤鴻已漸磐。菱荷裁野服。桑梓結清歡。庭草觀生意。漁磯息怒湍。親朋爭問訊。尊酒話團圓。佛國追成紀。荒經好補刊。若非身自歷。誰信語無譚。博異前賢少。瑰奇後代看。惠潮皆內地。小謫笑蘇韓。

楊元錫陽湖

黃沙莽莽無行迹。玉堂仙人碧霄謫。天山積雪沒馬蹄。一萬里去陽關西。長鞭搖搖入雲去。繞袖濃雲若披絮。怒龍鬪雷騰半空。蒼鶻攬人飛上樹。二事皆集中記所見一峯行盡復一峯。奇句題徧峯峯松。松濤嵐翠蕩胸臆。咳唾珠玉隨天風。天山盡處軍容重。曉謁轅門氣先竦。投筆能教壯士驚。請纓都訝文人勇。山中魍魅怒侮人。鍵戶瑟縮潛悲辛。同時遷客皆開譙。問訊爭來識君面。邀月空憐太白杯。微吟欲築望

鄉臺楓林青青塞雲黑。五更笳管腸千迴。殊方寧望生還路。玉門不信春風度。一道恩綸天上來。萬人感泣成甘澍。羨君出關復入關。匹馬仍復過天山。峯峯松雲若相識。馬首青山向君揖。添得長刀短後衣。用集生向玉關吹笛入。折檻曾憂直節難。賜環旋荷主恩寬。桂叢未老黃華綻。待得歸人酌酒看。故人握手驚且喜。快讀新詩搔首起。天生奇境待奇才。抉透靈光筆端使。吾謂才華學問雖絕倫。不若獨乘至性歸貞純。機聲燈影少年事。比鄰早羨樓頭人。君少時隨太夫人居外家樓上。與余比鄰。曾作機聲燈影圖。萬言伏闕直聲震。必于孝子求忠臣。一時風骨如君少。孤隼凌秋羽毛矯。長安冠蓋去復來。諸君袞袞奚爲哉。崑崙山高接西極。妙手圖成挂齋壁。和君萬里荷戈詩。醉臥牕前看山色。

莊宇達陽湖

雨露雷霆次第過。閒身始得返山阿。故園快把初衣遂。小謫榮於畫錦多。寫入丹青傳大漠。編成詩卷當章我。直開邃古鴻濛界。那數陰山敕勒歌。萬里輪蹄疲雪窖。孤臣心事挽銀河。履危欲坦顛輪道。出險迴思灩澦波。噩夢儘教游汗漫。壯懷難仗酒消磨。請纓畢竟書生志。不是封侯使荷戈。

孫 詔上元

身到金鰲最上峯。人間還種碧芙蓉。三年使節歸雙闕。一疏危言動九重。才子文章原慷慨。聖朝進退自從容。抽簪不比長沙謫。閒拄仙山綠玉筇。

黃郁章建昌

去歲長安中。說經當破屋。請業席縱橫。過午啜齋粥。仄聞罪言上。衆口譁不足。晨趨視行李。空庭烏啄木。追送踰國門。聞已單車促。驚沙翳盧溝。佇立傷遠目。男兒得罪去。身在已爲福。不知途路遠。寧惜毛髮禿。絕漠事耕種。揖讓非殊俗。行矣甘白頭。飽餒太平粟。而乃高厚恩。矜全天語獨。投荒未百日。歸及寒草綠。竄死固踰分。生還竟何速。海內幾交游。感嘆同一哭。我行到江南。問訊屢躑躅。昨逢曾大夫。示我書累幅。塞外天蒼茫。鐙前墨滲漉。又見先生筆。揩目再三讀。定知再造身。安心侶樵牧。村童及鄰叟。招要趁秋熟。嗟余迫行路。未共離樽續。寄詩隔江湄。遠勝招魂玉。

陳文杰錢唐

青海西頭咽暮笳。詔書萬里許還家。行周地角輕秦隴。赦出天恩陋漢槎。小謫夢隨金闕遠。生歸魂悸玉關遮。閉門自有名山業。珍重文章蔚國華。

陶渙悅上元

卿月分光照草萊。桂花迎客已全開。自攜塞北新詩至。爲訪江南舊雨來。落紙雲煙多古趣。驚人著作本仙才。秣陵佳味尊鱸美。好對秋風共舉杯。

已治安求益治安。賈生獻策瀝忠肝。桐孤真比臣心直。海闊何如帝量寬。諫艸傳來荒服遍。封章收上

御屏觀聖朝。赦過開言路。似此遭逢古亦難。

霜冷窮荒草盡斑。身騎匹馬出重關。獨由絕徼難行路。飽看中原未見山。一片丹心昭盛節。九重恩詔許生還。江湖切莫耽閒放。轉瞬除書紫禁頒。

積水潭邊荷滿池。秋藤花下酒盈卮。京華春好詩中記。悅在京師。屢陪塞外風寒別後思。蘇軾愛君青史重。朱雲折角聖人知。望公丰采還如舊。萬里行歸鬢未絲。

張問陶送寧

無詩無酒氣縱橫。誰指伊吾問死生。萬里風沙悲獨往。舊時李杜愧齊名。是非終向平心得。毀譽徒勞

衆口爭。落日安西凝望遠。浮雲難掩故人情。此首送關作。

窮荒一夕返驚魂。天遣春風度玉門。有詔傳觀褒諫草。無人申掾見君恩。全焚詩筆留心血。重製儒衣想淚痕。小別經年歸未晚。殘秋高枕夢江邨。

徐鑠慶金匱

才名落拓誤儒冠。醉著新書擬治安。抗疏已招時輩忌。謂平邪投荒還幸聖恩寬。龍沙地古人煙少。虎

帳天寒道路難。絕塞寄書愁不達。朔風涼雪祝加餐。

遭逢堯舜際昇平。忽謾狂譚四座驚。甚欲致君嗟乏術。須知涉世忌孤行。萬言書本違時用。三代人原

戒好名。他日朝廷思汲黯。春雲回首鳳皇城。

劉嗣綰武進

一紙書來笑絕纓。班超已復動歸程。龍鱗肯恕孤臣死。馬角終邀絕塞生。天上本無私雨露。山中還有舊柴荆。歸時好濯江流足。聞道銀河昨洗兵。惠遠城西萬里鞭。主恩到處總如天。長沙漫泣遷來傅。太白真呼謫後仙。聖世漁樵原戀闕。清秋蟹稻好歸田。登高准備茱萸酒。便有洪厓共拍肩。

蔣業晉吳縣

諤諤昌言動九霄。平生風義士林標。羅胸列宿窮三史。抗疏孤臣答兩朝。荒徼賜環天子聖。家山拄笏碩人遙。好賢不待蒲輪賁。有客欣開石室招。謂寧國府譚君設學仿紫陽書院幣聘相招。

汪爲霖如皋

談笑天山匹馬馳。讀書不愧是男兒。十年我見先生晚。一片心惟聖主知。塞月蒼涼隨遠夢。秋笳斷續入新詩。生還復恐除書到。未許江干理釣絲。

王豫丹徒

語罷月沉水。江濤忽怒飛。不緣明主詔。那許直臣歸。白髮悲青鏡。丹心戀紫微。朝廷留正氣。吾道豈終

非。

荷戈君遣後。近覺直言稀。君遣後。上諭廷臣曰。自洪某遣戍。無以君德民。隱上陳者。得毋以洪某爲戒乎。卽下旨放回。天語真堯舜。王心判是非。直教臣節愧。不負布衣歸。正值憐才日。終難臥釣磯。

吳嵩梁建昌

一疏居然動聖明。同時申救少公卿。窮荒天許重磨盾。請室心猶望洗兵。正氣三更銷鬼燄。邊愁萬里入笳聲。孤臣垂死恩難報。不願人傳敢諫名。春風吹入玉門關。天上金雞詔特頒。五月雷聲傾雪水。一梯雲影度冰山。神魚擁甲隨潮滿。龍馬如人立仗閒。留得新詩光萬丈。夜郎爭看謫仙還。

陳蔚青陽

侃侃陳詞迥不羣。高岡鳴鳳振朝曛。上書自謂同劉偉。移副何嘗異李雲。此日更生逢聖主。當時欲殺有將軍。荷戈萬里詩篇富。西域江山盡助君。

釋清恒焦山

一棹乘風過海門。千秋事業喜重論。長歌絕塞詩人福。卽賜刀環聖主恩。不殺眞能容直道。忘身始可得危言。而今暫與焦仙約。只恐天書下九關。

釋達瑛攝山

日窮西海歸東海。到處名山已盡探。正恐欲閒天未許。不妨暫借與茅庵。

又以下及門

呂培旌德

古人求忠臣。是必于孝子。讀書苟有得。家國一理耳。先生起孤貧。中歲乃筮仕。思親不能報。盡瘁供職使。詞臣兩抗疏。惜不作御史。刑官據成律。奏上擬殊死。巍巍聖人恩。幸免肆都市。出門卽荷戈。去去行萬里。先生愛遊山。崑崙插雲裏。先生校輿圖。絕域接天尾。何須博望槎。海已過安濟。長吟猿夜啼。慘淡塞烟起。洪河文思闊。葱嶺筆峯峙。冰雪悟餘光。風沙闡名理。盥誦每一過。孤懷緬朱李。

陳壤青陽

萬里輪臺縹緲間。迢迢車馬出秦關。探窮星宿源頭水。題遍崑崙界外山。諫草至今留御座。詩篇自昔滿人寰。盤根錯節寧無意。大任將肩豈等閒。

譚正治旌德

一片金戈鐵馬場。挺身原不計冰霜。詞臣舊慣鸞坡直。謫吏今趨虎帳旁。萬里外圖時勘校。卅年前夢未荒唐。此行敢爲先生惜。只籌天山債已償。

陳 塾青陽

黃沙四起朔風吼。萬仞雪山迎馬首。批鱗不殺投新疆。狂直緣知聖恩厚。書生此去學荷戈。天語傳來誠耽酒。手疏猶縈聖主心。頭顱豈落將軍手。崢嶸壯志銷不得。搖筆精神益抖擻。黃沙青海入險鞍。毳帳旃牆歸墨藪。嶺海欣逢吏部韓。沅湘快得儀曹柳。百日方周卽賜環。選秀剔奇愁未久。暫從西域歸東海。小挫亦知終大受。君不見。丈夫勳業高星斗。豈獨文章垂不朽。

呂 璽旌德

似此遊方壯。身危氣不磨。夷堅窮地軸。博望溯天河。烏道千山折。龍沙百日過。從今校圖說。時辨古人訛。

汪 璜旌德

月朔先舒月一鉤。望鄉客上望鄉樓。投荒漫作中原夢。此是西南天盡頭。莫作烏孫戍卒看。十年長見侍金鑾。天山百丈冰和雪。尙念瓊樓玉宇寒。奇山奇水酷相思。勘徧方輿卅載時。應恐較圖遺塞外。天教萬里走焉支。中壘文章冠漢京。石渠天祿校讎精。先生前後相輝映。不愧齋名號更生。

呂偉標旌德

于澗丹徒

昨返南湖棹。來尋西海菴。先生昨從洋川書院回。即至焦山避暑。要隨雲共宿。不與佛同龕。蓬島頻年住。河源一昔探。讀

公詩百首。何異啓瑤函。

譚時治旌德

已束傳經帳。何期出漢都。歲已未。家祖延至書院。課經。後以入都奔國。卹不果至。心惟天子諒。詩創古人無。鏡硯藏行篋。關山入

畫圖。喜今趨鹿洞。一一指前途。

譚貴治旌德

萬里沙場外。孤臣匹馬過。死生冰雪裏。呵凍尙高歌。探遍天山境。詞人幾輩迎。生還恩渥厚。足慰著

書情。

曹景先績溪

平生學業尙淹通。解詁居然並馬融。聚米圖知詳地域。生花筆更奪天工。萬言削牘人爭誦。謂征邪。教疏。五

字堅城客敢攻。文苑儒林兼獨行。問誰能繼此宗風。

更生齋詩卷第二

百日賜環集

庚申又四月廿七日特奉恩命釋回感事紀恩四首

出關無別念。止有首耶願。何期聖人恩。特敕返鄉縣。將軍塔下九叩頭。微臣之命天所留。上慙螟螻下螻蟻。百計無能報天地。

曩臣七十人。臣罪最不赦。寧知未旬日。先已詔書下。一人泥首百衆隨。塔下戴德聲如雷。命輕恩重無所惜。挺劍終南殺殘賊。

虞翻作逐臣。一世未賜環。縱有骨肉親。不敢期生還。聖恩直與天地參。投畀有北仍歸南。鶴鷓怪啼魍魎笑。此客入關真再造。

五月始生魄。送者盈北關。捆載戚友書。代致閭里間。入關一日走一驛。計到江南上三月。茲還夢想所不及。到日閉門先感泣。

將發伊犁留別諸同人

如天聖主沛殊恩。料理投荒未斷魂。一體視猶同赤子。十旬俗已悉烏孫。詎留齒髮歸銅柱。西去卽鄂羅斯相傳有唐

燒時銅柱上鑄寒門二字西域人死者魂氣皆歸于此如中國之岱宗云真戴頭顱入玉門。他日荷耒農事了。築廬先署海西村。嚴鼓三聲曉漏收。將軍營外引壘囚。此生不料能歸骨。萬死無言祇叩頭。常擬帶刀同佩犢。何曾投筆學封侯。渾河橋畔春波闊。一輩羈人望未休。

別惠遠城

下馬步出城。百步屢駐腳。長刀短後衣。未忍卽拋卻。逐客縱已歸。猶念未歸客。今宵路岐夢。分道向南北。

瑪瑙斯龍鬪雷行

雷欲飛出山。石忽逼雷住。龍神復驅石。橫截雷去路。龍施水法雷火攻。水影火影懸當空。水火燄燭星辰宮。忽然雷奔龍亦走。龍旁小龍突張口。奪得雷輪大如斗。雷神歸山訴失守。

綏來縣

十里一戍樓。無異畿緊赤。山城忽橫亘。云以界西北。關門白髮吏。日昨適上值。椽微襄要務。奸宄亦專責。車旁勤問訊。藉以驗名籍。其餘童僕馬。無不視清冊。長吏出郭迎。吏驚竄無迹。招邀驛亭坐。先已具朝食。官賢誠念舊。一一訊遷客。不知經年來。添得幾相識。離家萬餘里。百事宜自適。諄諄意良厚。共話移晷刻。客去始閉門。林陰正西直。

呼圖壁

一日渡百河。馬力亦已疲。星光瀉空灘。懸溜復四飛。豈惟乏纖鱗。波急草亦稀。渡旁茅屋中。燈火已出扉。騎馬入土城。夙與仙尉期。佇聽鄉井談。藉以慰渴饑。兼聞徐南昌。時同年徐大令午亦納贖將南歸先時理征衣。倘得合伴歸。百驛庶不迷。語盡夜已闌。當窗警晨雞。

二十日抵烏魯木齊。那靈阿州守顧揆熊言孔徐午三大令。頻日致餞。即席賦贈三十韵。

我為東海臣。罪重謫雪嶺。前行望西海。祇隔八達頂。聞言潮洶洶。已備閩越艇。窮商咸裹足。此道實荒梗。

來時冰萬丈。去已孕桃杏。投荒雖百日。屈指萬千幸。曩臣先未到。幕府業奏請。國書三百字。引例悉嚴整。

狂愚乃至此。不殺不足警。余未到時總統將軍已具清字摺密奏稍陷故轍即一面入奏一面正法磨刀營門前。到日即延頸。鼓嚴方喚入。長

跪氣先屏。厲語若雷霆。官皆上持梃。歸來荒屋下。閉戶匿形影。時時語僮僕。恐不待朝景。皇恩實寬厚。往

返不俄頃。倘非如天德。未免汚湯鼎。同官接踵賀。喜極代咽哽。珍羞羅中丞。陳巡撫方伯邀說餅。歸方伯微

生仍懼禍。觴至代以茗。離城三十里。馬尚不敢騁。旬時經精河。庶獲保要領。脫身豺虎穴。足甫踏人境。自

來以東方設郡縣與軍台稍異明明天與日。再得見公等。前時覆尊疊。前至此斷飲今此復酩酊。非云肆荒宴。聊記受恩

立。時徐亦奉文將歸況聞寬大詔。悉欲洗尤眚。昨讀諭旨以京師甘霖普徧並赦常所不能赦者遂令九死客。一一返鄉井。兵先清隴蜀。

盪滌到河頰。災黎都踊躍。羣盜命合併。巖廊固無論。耕鑿亦清靜。東歸理春田。彌覺化日永。此意告故人。

故人應早省。

將至滋泥泉汛雨

未來滋泥泉。風色忽十丈。南山青數點。龍已抉雲上。排頭盡如瓮。勢欲穿疊嶂。須臾雲腳下。牧豎指所向。冥濛半犁雨。谿水未及漲。洶洶南溝頭。牛羊尙奔放。沿村拾新麥。打鼓雜俚唱。車箱徐徐眠。北斗挂客帳。四十里井汛。

四十里井間。祇有十家住。十家汲井過。併向麥畦注。麥肥如野菽。飽食耐征戍。耕餘了無事。間或插桑苧。遂令半里間。夾屋無雜樹。南山團作障。三面塞去路。時有歸墟人。穿雲白如鷺。

三臺夜宿

峯巒南北途千曲。天半亂霞烘馬足。山程九十到未遲。覓得山村最西屋。綠莎窗開波影搖。酒渴我尙餐山桃。夜闌殘月僅一綫。紫燕白鴿爭歸巢。

未至吉木薩二里見賽神者絡繹不絕時劉二尹之芳亦出城相迓因作此以贈

彩旗彩勝從空墮。滿屋春人賽神坐。賽神已畢跨馬忙。十里紅袖沿春塘。城東出城愁不及。爭上城樓向西立。鐘魚聲中角聲響。馬上人皆避官長。

廿九日發古城巡撫伊江阿大令阮曙竝馬送至水磨閣茶話乃別

出城聞泉聲。到閣復數里。逶迤岡四面。雲向水中起。濛濛萍藻綠。水鳥浴未已。曲處響始奔。驚流出潭底。人栽沙果好。都入北窗裏。板屋止兩層。高瞻忽迢遞。殷勤相送客。門外尙餘幾。揮馬去不停。林長久延企。奇臺訪同里。張縣尉潮海。

一刺字半滅。長鬚方叻叻。縣尉赤足來。窺門忽呼號。前月流人來。今月流人返。聖恩真如天。來去僅旦晚。飯我屋正中。浴我堂北箱。百斛塵土盡。陡然餘清涼。主人雖至誠。留客已不及。三更出東城。持燈上車急。道白山口取小南路往哈密。

一山傾欹一山斷。宛轉前行入螺旋。山頭雲氣復四飛。人行忽如蠶綴衣。行完百里無一家。荒宗并乏棲林鴉。黃羊上嶺客登樹。相望遙遙徹天曙。是夕人馬依高樹下宿。

道中遇大風避入山穴半晌乃定

白山之東絕椽瓦。間有土房人亦寡。雲光裹地亦裹天。風力飛人復飛馬。馬驚人哭拚作泥。吹至天半仍分飛。一更風頹樵者喚。人落山頭馬山半。

將至七箇井宿

日脚欲下雨脚酣。半嶺草色同江南。山坳一道去如綫。卅里外人皆覲面。霞光天半色若頰。新月竟與斜陽爭。星光延回日光暝。一道彩雲生斗柄。

朝發七箇井雨

初陽甫出山。絕壁忽挂雨。馬行益奮迅。踏破雲萬縷。濛濛戈壁暗。行及卅里許。我僕穿徑來。提壺挈筐筥。陰厓巢老鶻。猛志欲攫取。征人思暫佇。我意仍未許。空翠落不完。欣同僕夫語。

初四日至節節草店露宿

新雨乍傾飛瀑溜。一尺水深疲馬瘦。雙鞭齊舉馬忽騰。傾刻已過坡三層。駝蹄峯前祇一家。新月欲出峯攔遮。車箱兀坐夜忘永。腐齒猶能截堅餅。

早行四十里至一間房小憩

大風搖天山。旬日不出屋。茅舍縱一間。寥寥雞犬足。昨宵天始霽。雞犬屋頭宿。尤欣飛溜急。潭水綠如玉。心空聊酌水。小坐傍車軸。亭午尙一程。搖鞭出林曲。

瞭臺三老柳行

自根及頂僅二尋。老榦橫披忽千丈。梢梢幸遇坡陀轉。不爾居然勢奔放。驅車覓路尤盤曲。騎馬入林時

俯仰。風飄羊角忽迅厲。枝撼鵲巢頻震盪。排空欲攫雷電影。入暝爭言鬼神狀。土人所言如此清泉竟爾流根窟。

飛瀑無端挂枝上。半晴半雨勢乍分。一榦一枝形不讓。近看十戶民居繞。遠與萬株松翠抗。鍊形或是倚

丹井。相近有丹井挺榦終須挾青嶂。距村十里復掉頭。攔路青葱尙堪望。

至蠟子泉雨驟大

戈壁無端雨。先愁急溜衝。電低偏嚇馬。雲薄不藏龍。躑躅千盤磴。低迷萬樹松。時南山口前行及山寺。剛打午時鐘。

宿沙棗泉

伊犁三月三。哈密六月六。風日固自佳。其柰客幽獨。今宵宿沙棗。馬病擾心曲。時一馬中暑病五日不食矣揮扇急出門。臨流看飛瀑。林長久延佇。石喜可容足。鴉巢厭人影。月出競相逐。雙燕獨有情。更殘導歸宿。

余發伊犁日理事。同知哈豐阿贈一白馬。性極馴謹。行抵白山。改道由小南路。馬忽中暑。五日不食。至三堡。汛勢垂斃。矣詢于逆旅主人。主人以爲尙可救。余卽留以贈之。并作一詩寄意。

視爾如新僕。相期返故鄉。艱難同所歷。寒暑忽違常。魂豈招中野。年疑等下殤。頻行亦何意。偏一傍車箱。
自三堡至頭堡。一路見刈麥者不絕。多回部所種土人呼回部爲纏頭。

三堡至頭堡。畝畝麥新刈。咸攜薄笨車。往返數難記。伊吾節候晚。已及三夏季。纏頭何辛勤。風雨所不避。全家挈筐榼。兒女在旁戲。一歲祇一收。倉箱已云備。窮荒無天時。祇復收地利。今看戈壁外。沃壤庶無棄。

尙書膺大任。本裕經國計。時覺羅長麟爲甘陝總督秦隴多流民。移來就邊地。邪教近又滋擾秦隴一帶并突至靜寧安定間抵哈密日誠毅。伯伍彌烏遜。招飯署東蔬香圃。

屋中書繞屋。堂下水周堂。清絕無餘事。時聞薜荔香。
昔聞東陵侯。今見安山伯。皆種五色瓜。偏能餉行客。
蔬圃雖一隅。百種花皆具。成團胡蝶來。成團胡蝶去。

相公眞藎臣。

侯爲大學士
伍彌秦子

司馬習邊事。哈密土魯番。十年勞臥治。

長流水題壁

短流頭。長流頭。長流水。流不休。黃蘆關。格子墩。二百里。無軍屯。黃塵燒。赤日炙。聲如雷。裂山石。

自哈密至苦水鋪作

兩車一馬裝亦華。後乘滿載敦煌瓜。一旬戈壁苦無食。幸與瓜時適相值。日昨長流河。今日苦水泉。不復置茗椀。惟應進瓜盤。兩旬遙遙入關口。縱剩數瓜當亦朽。卽以車藏酒泉酒。

十三夜三鼓抵星星峽

天上星。白皚皚。地上星。黑纍纍。星星峽中十五夜。天星地星光激射。一屋皆支一星罅。須臾天晦地忽明。地星卻比天星青。北斗黯黯雞初鳴。聲三號。眠一眨。炎炎火星星星峽。

月夜自馬連井至大泉

入夜程偏好。微茫大小泉。鵲巢雲外突。馬影月中圓。達板驚斜下。征車偶倒懸。林梢瞭房近。已有角聲傳。

度赤金峽

茲山多赤雲。石石悉靈異。冥濛當月午。寶氣燭天地。丹砂亘南北。碧澗分巨細。絕頂開石房。玲瓏逼天際。青羊及馴鵠。一一向空睇。稍南盤一徑。石古路如砌。森森女媧廟。客戶競私祭。兒童聚鄉塾。師出盡兒戲。黯黯神燭昏。脂車作行計。回坡何雜沓。足滑沙石膩。出峽月已高。驚聞鼓聲沸。是夕村人賽神。

入嘉峪關

瀚海亦已窮。關門忽高矗。風沙東南驅。到此勢已縮。候門餘數騎。駿足植如木。風遞管鑰聲。巖扃忽然拓。城垣金碧麗。始見瓦作屋。羌回分畛域。中外此樞軸。曉日上北樓。長城莽遙矚。平衢馳若砥。雪嶺俯如伏。天形界西域。地勢極南服。數折向郭東。泉清手堪掬。尤慙關令尹。來往餉芻牧。駐馬官道旁。生還慶僮僕。示關吏

詔許南回理釣磯。寄聲關吏莫訶幾。書生萬里歸裝內。添得長刀短後衣。

涼州城南與天山別放歌

去亦一萬里。來亦一萬里。石交止有祁連山。相送遙遙不能已。去年荷戈來。行自天山頭。天山送我出關去。直至瀚海道。盡黃河流。今年賜敕回。發自天山尾。天山送我復入關。卻駐姑臧城南白雲裏。天山之長亦如天。日月出沒相回環。朝依山行莫山宿。萬里不越山之彎。松明照徹伊吾左。隆冬遠藉天山火。安西

雨汗揮不停。酷暑復賴天山冰。天山天山與我有夙因。怪底昔昔飛夢曾相親。但不知千松萬松誰一樹。是我當時置身處。茲來天山樓。欲與天山別。天山黯黯色亦愁。六月猶飛古時雪。古時雪著今楊柳。雪色迷人滯杯酒。明朝北山之北望南山。我欲客夢飛去仍飛還。

古浪縣七夕

古浪縣邊逢七夕。天河橋外說雙星。夜深偶憶小兒女。遮夢遠山無數青。昨來三伏差快意。飽啖甘瓜過肅州。留得一枚如碩果。夜涼聊與薦牽牛。

過枝陽渡

危樓在天上。天半一橋橫。清絕枝陽渡。平番只半程。水如天上來。欲冒四山出。四山如覆釜。東北口微缺。

自武勝驛抵平番

萬重山險忽已收。又轉百曲羊腸溝。前行正愁途愈窄。對面乃復來車牛。馬行攢蹄牛怒目。百計方能挽牛足。牛人咨嗟馬夫歎。半日誤程時已宴。南行噪鵲北喚鳩。晴雨亦如風馬牛。

客歲在請室中。崔大令景儼頻入問訊。就道時又送我獨遠。今歲余奉恩命。釋回大令適官蘭州。先飛札道中。急待把晤。因率占一律以寄。

纔辭獄吏仍低首。乍見交親卽解顏。杜甫預悲成死別。虞翻偏幸得生還。含辛客路犇馳速。旁午軍情措

置艱。崔時理軍需總局爲我急沽桑落酒。與君先話祝期山。祝期山卽火礮山

十五日過車道嶺時尙留一巨瓜。因分餉僮僕及同行伴侶。并以瓜皮飼馬。

西域餘一瓜。剖餉及童馭。瓜皮兼飼馬。人畜皆悅豫。

征車方下嶺。雲已沒車轍。風向西北來。天空雨絲白。

荅楊文學琴

我前訪子梁溪北。鯉魚如龍相對食。昨君覓我黃河邊。北風如虎吹出關。出關入關止三月。意外訪君君

不測。君前寄我詩一篇。令我回環誦難綴。君今五十道在躬。遊歷幕府寧終窮。布衣欲作車丞相。文教先

布船司空。我今欲行爲子留。攜手且上黃河樓。黃河洶洶欲歸海。我屬河流少相待。海上先人敝廬在。

七月杪道出西安。費大令濬邀集同里二十餘人。宴我于署齋之海棠小舫。卽席賦謝。

短衣昨日過咸陽。故舊都憐鬢髮蒼。赤汗馬驚來異域。余乘一大宛馬入關。是日贈莊刺史炳。素心人喜盡同鄉。蓴羹鱸膾

秋皆具。是日饌皆鄉味。雪窖冰天夢未忘。蘇武廿年臣百日。坐中客以蘇武牧羊圖見贈。感恩真欲罄千觴。

八月十五夜中牟旅次邀李巡檢宜春及逆旅主人共飲待月作解餉回。李自甘肅

居然一斗鄭州酒。復有雙尾滎陽魚。秣陵醉尉興不淺。逆旅主者言非迂。秋花叢叢入檐隙。眉上都飛一

輪月回汀風勢疾轉徐。出水月光凹復突。酒行千巡客將起。頭上玉簫吹不已。主人長嘯客亦呼。秋燕驚飛鵲巢裏。官漏亦已絕。車鐸又復喧。明晨醉眼上鐵塔。飽看萬筆揮如椽。時值秋試

十六日抵祥符與蔣表弟青曜話舊

十年又向祥符過。把臂故人無一個。祇餘髯蔣住北頭。貧病亦憐豪氣挫。我行萬里歷七州。腹痛屢過元規樓。昔遊西安開封皆依畢尙書節署主人蛻去巢已毀。我正荷戟天西頭。前遊轉悔耽書誤。風月梁園等閑度。嚴明徐長王復晉邵涵晉約客頻。只我書堂日扃戶。此時豪興忽復來。無意更上城南臺。土街嘈雜棚巷窄。且擇隙地同徘徊。三更開筵四更歇。望後清涼一輪月。與君歷落論盛衰。逐客亦厭遊天涯。

十八日杞縣東郭阻雨

兩日兩夕秋雨大。杞縣東頭不能過。疲羸顛蹶泥土中。油衣不完油轎破。水深一尺村農喜。東陌西阡麥苗起。鄙人拚得三日留。只恐灌頂黃河流。

商丘作

三日愁霖大。黃河欲倒流。魚蝦成水市。鵝鴨占城樓。久戍兵纔返。時守兵牛隨巡撫守盧氏經時麥未收。儒生半投筆。

土人云今歲應試者最少爭欲事兜牟。

廿三日將至江南境大雨

堪憐海西客。纔聽江南雨。迢迢萬里來。海西十日五。雨行何稽。八窗檐漏無時歇。寒甚燭光青欲裂。愁中
淮岸三尺風。夢裏天山萬年雪。

過宿州

鵲鳩聲裏轉西風。秋色江南倍不同。夢醒鄉心覺棖觸。瓜花黃過宿州東。

宿州東阻雨

州南飛鷺絲。州北富葑草。茫茫葑草高逾屋。白鷺絲多部民少。州城正當決口衝。三板不沒天回風。扶攜
老幼向何處。江北民戶逃江東。高田出水曾無幾。卻慮河流更東徙。河魚驕盛不畏人。白日城牆曝腮尾。
東西路斷已經月。門外水泥皆尺一。投荒客到且不愁。飽飯魚蝦待晴日。
道中無事偶作論詩截句二十首

偶然落墨竝天真。前有寧人後野人。金石氣同薑桂氣。始知天壤兩遺民。

早年壇坫各相期。江左三家識力齊。山上蘼蕪時感泣。息夫人勝夏王姬。謂吳祭酒偉業爲江左三家之一。

筆底居然絕點塵。卅年大雅藉扶輪。爭傳北宋南施好。恰與邊徐作替人。

蠶尾山人絕世姿。聆音先已辨妍媸。何應一代才名盛。只辦唐臨晉帖詩。王尙書士正

藥亭獨漉許相參。啞苦時同佛一龕。尙得昔賢雄直氣。嶺南猶似勝江南。

只辦人間時世粧。名姝未稱古衣裳。查編修不凡作事惟龍子。拍手先驚解律光。陳檢討

校刊存疑信可嗤。近人刻吳天章集于一後先相距不多時。名家往往無全集。贏得人傳選本詩。謂吳雯

等。

窘于篇幅師王孟。略具才情仿陸蘇。學古未成留僞體。半生益覺賞心孤。

晚宗北宋幼初唐。不及詞名獨擅場。辛苦謝家雙燕子。一生何事傍門牆。朱檢討

茶烟縷縷出山廚。遼左名家竝不如。一事枉拋心力苦。欲將尚史比藏書。李青山人

長慶老郎人不識。開元宰相帝先知。試看甲秀樓頭句。不愧名同諸葛祠。鄂文端爾泰有紀功鐵柱在貴

忠武享堂亦名丞相祠堂

近來浙派入人深。樊榭家家欲鑄金。何似耕餘老居士。百篇猶有古遺音。謂鄭孝廉世元

遊戲詩應歸苦海。性靈句實逼香山。同時老輩猶難及。只許錢程伯仲間。袁大令枚錢侍耶

四十九年前一日。世間原未有斯人。此二句阿文成相公奇句誰能敵。祇覺英雄面目真。載程編修晉芳

雲谿南北兩詩人。黃景仁追楊起文。不以烟霞蓋簪笏。尙書亦足張吾軍。錢文敏

鬼簿算經雖作俑。王楊盧駱信難訶。近來海內詩家少。一半人誇記誦多。

氣粗語大定何如。百輩先慚筆力輸。各有醇疵不相掩。弁山前後兩尙書。謂畢宮保詩集才氣橫逸

虞山文筆比詩工。邵編修齊齋一卷齊梁體格同。贊善鄭贊善文學韓王大岳。愛才兼有古人風。

描頭畫足高東井。高孝廉文照盪魄回腸瞿叔遊。瞿主簿華都遂上虞張處士。每誇醉刎月氏頭。張處士鳳翔上三人皆同余在安徽

學使朱學士筠署內張有詠西瓜燈詩內一聯云藍團盧杞臉醉刎月氏頭

祇覺時流好尚偏。并將考證入詩篇。美人香艸都刪卻。長短皆摩擊壤編。

將至固鎮

平岡方縱眺。烟水忽無涯。一道黃蘆港。都成白鷺家。竹房經雨壞。漁網帶風斜。問路偏難準。蒼茫十里賒。

過臨淮關憶亡友黃二景仁

及到淮南路。尋思三十年。夜窗書共讀。吟舫客如仙。癖更誰能解。貧仍不受憐。傷心黃叔度。泉下已高眠。

過滁州憶亡友朱訓導沛

所交盈海內。誰可作人師。只有朱居士。無慙元紫芝。百篇于道近。七十入官遲。腸斷西岡路。瀕行手重持。

自浦口放舟至觀音門

且展蓬窗緩舉杯。蒲帆百尺水鳴雷。不妨東海波臣笑。逐客新從西海來。

燕子磯守風

陸程何其長。一百二十日。方買一葉舟。風急橋又折。空灘一步不可移。烏鷁亦向西南飛。蘆花白處雲氣

黑坐看日腳平沈西。逐臣自分千天譴。萬死南回尙難免。何堪十日五駐程。風伯雨師頻致餞。柁樓攤書讀不休。飽飯更上空王樓。浮生過眼行可歎。沿江纍纍石俱爛。

抵家

鄰舍牆頭望。親朋戶外呼。生還亦何樂。聊足慰妻孥。

雪窖冰天歸戍客。瓊樓玉宇謫仙人。生還檢點從前事。五十年如夢裏身。

趙兵備翼以長篇題余出塞詩後報謝二首

四岳三塗力不支。避公海外去吟詩。惟餘日月同中土。不覺鴻濛是昔時。山鬼慣覘人動息。天龍爭共馬奔馳。歸裝正苦無奇句。辜負先生弁首詞。

老結雲谿宋莫鄰。詞場官局幾番新。七千里外尋陳語。君前任貴西兵備及余視學此省已距二十年尙于行部時見君吟詠十四科中認

後塵。雪舫正堪談往事。雲山難得共閑身。玉堂此度眞天上。公作邊臣我逐臣。

附原贈作

趙翼

人間第一最奇景。必待第一奇才領。渾沌倘無人可鑿。不妨終古懵不醒。中原一片好景光。發泄已盡周漢唐。所未泄者蠻獠窟。天遣李白流夜郎。又教子瞻渡瓊海。總爲僞昧開天荒。伊犁城在西北極。比似炎徼更遠僻。烏孫故地羶裘鄉。雖吐何曾讀倉頡。近年始入坤輿圖。去者無非罪人謫。一聞嚴謹當

出關如赴鬼門。淚流赤豈知天固不輕與。若輩紛紛何足數。要等風騷絕代人。來徇鴻濛舊風土。稚存先生今李蘇。狂言應受櫻鱗誅。熱鐵在頸赦不殺。廣柳車送充囚徒。天公見之拍手笑。待子久矣子纔到。鍾儀故是操南音。斛律何妨歌北調。從此天山雪嶺間。神馬尻輿恣吟眺。國家開疆萬餘里。竟似爲君拓詩料。卽今一卷荷戈詩。已如禹鼎鑄魑魍。狂風捲石落半嶺。堅冰鑿梯通九達。人驚鵬撲抱頭竄。雷怯龍鬪飛輪馳。生羌變驢或剩腿。降夷化魚皆遊屍。皆詩中隨手拈作錦囊句。諾臯狹陋寧須支。翻嫌賜環太草草。令威百日歸華表。倘更留君一二年。北荒經定增搜考。憶君唯恐君歸遲。愛君轉恨君歸早。

歸里後案頭見友人問訊書積已盈寸作此奉答

南歸真復對妻孥。更訪黃公舊酒壚。絕域先傳界豺虎。故鄉曾否見鷓鴣。山海經鷓鴣見城郭則其國有放士傷離罷種文無草。避毒誰攜押不蘆。時有友人索阿魏等藥故及之好語海濱垂釣侶。鮫人休更淚成珠。

余文學彫畫山水竹石幅見貽作此報謝

千山萬山客始還。無夢不與山相關。忽然一客款門至。贈我百尺山彎環。危牆陰陰日光縮。復有三竿五竿竹。故人此意良獨殷。以竹以山娛宋莫。故人昔日知名早。下筆萬言超意表。賣文不活方賣畫。賣畫纔供一家飽。憶君更憶君茅堂。亦有怪石兼修篁。茅堂東邊雜雲樹。我昔曾從畫中住。腹痛鄭公門外路。君

人會受
經師也

答友人問近狀三首

自從伊江歸。閉戶不敢出。惜無先世田。可以給晨夕。中年一哀樂。并力事撰述。茅廬枕江汜。日起掃一室。蕭閒無客至。時復理卷帙。庶幾能備書。八口仰以活。

一兒初計偕。一兒未離塾。呼僮拾墮薪。庶可佐宵讀。其餘孫與子。襁褓尙善哭。梨桃雖未競。時欲索餽粥。昨來山中友。約我種黃獨。善卷山地美。歲歲少荒熟。吾將攜長鑿。畢命此山谷。

昨來方閒居。老僕忽窺牖。貽我尺素書。言來自江口。側聞雲霄客。念及耕釣叟。飢寒門內事。詎足累交友。幸茲中歲後。神智未衰醜。奇書倘編校。事或需下走。吾雖乏三長。一得庶時有。囊錢與束脯。計功良可受。立春前一日出郊訪迎春堂故址因遇園叟均祥話舊均祥余乳媼子

四十一年上。衰翁挈冢孫。來從太平寺。閒訪小東門。野鳥顏寧識。堂獅劣尙存。惟應灌園叟。猶認乍歸魂。兕觥還趙歌。爲趙大令貴覽賦

神廟嗣立當冲年。方禮師傅開經筵。忽然宰相報父死。據政乃不思歸田。編修吳中行。檢討趙用賢。詞垣本乏諫諍責。抗疏反在臺臣先。二公不死實天幸。血肉狼籍彤廷前。此時英英許文穆。獨執兕觥行且哭。同官餞別事亦常。正氣稜稜挽朝局。君不見。救朱雲。辛慶忌。救陽城。張萬福。武臣何忠諄。文臣反瑟縮。差

強人意惟許公稍爲儒生洗慙辱。此觥閱歲二百餘。如璧歸趙盟無渝。我作兕觥歌。淚若綆貫珠。忤宰相者罪瀕死。忤聖主者當何如。始知吾皇聖德古所無。歐刀在頸赦不誅。僅使萬里行長途。樞庭昨忽下急符。絕域已把流人呼。小臣萬死不蔽辜。乃復荷此天高地厚恩。施殊我欲借兕觥。獻觴于九重。并爲千古萬古臣子勸。曷不肝腦塗地歸命于蒼穹。君不見。以今視昔何不同。堯舜之主臣。偏逢漢文宋哲尙爾遠不及。何況明代末葉之神宗。嗚呼曷不肝腦塗地歸命于蒼穹。

劉舍人召揚自山左寄示潘文學夢陽驛柳詩四首并約同作因恩猝賦此卽寄文學

萬緣濛濛夾去津。鞭絲影裏柳絲勻。何曾肯綰千回別。只解平飛十丈塵。地近紅心愁戍馬。天留青眼閱勞人。春明門外重分手。一度相看一愴神。

半生蹤跡共榮枯。記得迢迢往事無。李白舊曾傷遠道。楊朱今與泣岐途。秋期黯黯金風透。春路茫茫玉雪鋪。擬向下河亭長說。流年真欲寫成圖。

憶共柔條賦遠征。出門西望迴含情。萬株密蔭長楊館。一逕斜穿細柳營。馳道舊聞通候火。捷書先喜報銷兵。風光畢竟秦中好。走馬來聽谷口鶯。

和烟和雨一絲絲。三復君家憔悴詞。絕憶戍樓勞遠望。前歲余遣戍時君適在都下送我獨遠并傾囊中裝相贈別幾曾驛使寄相思。

愁生王粲南登道。君時卽南歸話到桓公北伐時。惆悵玉門千萬里。含情頻折最高枝。

小除日卷施閣祭詩作

不意茅齋內。居然拓八窗。源曾探西海。派尙憶長江。逐客形非獨。寒梅影亦雙。百壺聊自慰。淺醉對銀缸。

更生齋詩卷第三

山椒避暑集

辛酉正月二日步至前橋村上冢兼至大姊宅久憩

我行八九里。筋力喜尙強。前抵松柏林。連塵眺層岡。步緊不敢舒。先世之所藏。何意俯仰間。愛弟亦在旁。攀條泫然悲。我鬢久已蒼。地下骨肉多。會面庶久長。半里謁姊居。迎門慶扶將。亦有容膝居。闔戶羅酒漿。三田昨大收。已穀一歲糧。我謂隙地多。代補幾樹桑。卻待菜作花。還來啜新黃。

天寧寺僧借月兩以詩見投戲得八百二十字報之

我性不佞佛。而喜方外交。苦憶揚州僧。八旬名誦茗。西山有顛禪。神理亦復超。不語已九年。見客兩手招。今爲謫吏歸。偶詣知客寮。聞有借月僧。形穠事推敲。爲爾攜蠟屐。爲爾經谿橋。爾從百僧中。揖我坐砌坳。我于儔類間。望爾成詩豪。峨峨巽宮樓。宵爾詩筆高。迢迢西蠡河。似爾詩致遙。不然艤舟亭。綠水可半篙。與子攜竹鑪。悠悠泛輕橈。不然紅梅閣。絳蕊已半飄。與子學坐忘。沉沉爇香茅。否則樓三層。夜半禮絳霄。否則塔七級。凌晨歷高標。猶勝居一菴。時時坐團蕉。蒲牢吼五更。木魚響終朝。禮佛佛不知。泥塑而木雕。喞佛佛不應。唇乾而口焦。窮老盡氣時。生趣總不聊。不聞金剛禪。能拒鬼伯邀。不聞大乘經。能使罪孽消。

他人飫八珍。爾獨食一瓢。他人襲重茵。爾僅絮一條。趨承衆檀那。世故仍膠膠。經營伊蒲餐。歲儉猶嗷嗷。不知天生人。洪鑪鼓鴻毛。天無所容心。人何必太勞。我得定命丹。非世所及料。生老與病死。安坐任所遭。不知人在世。蟻蝨處縑袍。附身身不知。偶或相爬搔。我得養生法。身外一切拋。雞豬與蔥蒜。遇便卽飽饕。結習苟未忘。間或追風騷。我唱子必和。我歌子其謠。三百六十日。往往忘晷朝。一十二萬年。茫茫齊壽夭。縱有甲子期。何必詢大撓。似聞三神山。亦已沉六鼇。羣靈無所歸。空中任翔翺。誰向足底過。下士嗤盧敖。生生遞銷除。物物難堅牢。惟有行樂方。可解末俗嘲。麴生時時來。向我屢折腰。醉鄉何其寬。一世皆并包。炎精貢火梨。金母致木桃。灤河鹿重胎。淮浦蟹兩螯。流沙割么鳳。壺水烹文鱈。芸芳出陽華。桂樹生招搖。閩中紅荔支。涼土黃葡萄。南州設寒具。北地致冷淘。妖姬萼綠華。童真王子喬。爲我彈素琴。爲我吹玉簫。湘靈鼓瑤瑟。洛浦鏗雲璈。或欲赤雙足。或復垂雙髻。翩翩有光施。裊裊難摩揣。醉飽爲語言。古欲過卦爻。縑鋪三百軸。軸軸鮫人綃。文簫與采鸞。爲我玉手鈔。醉呼日月星。啜我醪與糟。狂吐江海流。變作醇與醪。子其從我遊。飄飄復飄飄。庶幾末路惺。不爲異說淆。彼教倘有人。卽以子作格。仍煩走諸方。一一呼其曹。或歸士與農。或混漁與樵。同祈享昇平。各復修宗祧。充腸苦齏鹽。潤之以脂膏。章身厭袈裟。束之以紳條。郁郁梅檀香。化作蘭與椒。森森旛幢林。化作旌與旄。所得如邱山。所失無纖毫。一炬尙可收。無待原火燎。一派尙可挽。無待洪流漂。我爲子作詩。非徒逞喧囂。冀子鑒苦心。中道回風颯。戒衣旣已穿。華髮亦已彫。

生既不可恃死亦不必逃。我言既諄諄。我醉仍陶陶。

過祥源觀訪陳刺史明善

故人近住祥源觀。老友時過楊陟庭。謂楊刺史。徐字陟庭。準待北河春水發。墅橋安穩共揚舲。時約遊。

十四夜同人至各廟觀燈。柵歸路過白雲谿步月。

青牛老子廟。白馬社公祠。古屋門齊敞。疎燈架已支。凍梅纔放後。春月正圓時。卻向雲谿步。無嫌夜漏遲。

辛酉元夕燈詞十首

百串歌珠百串燈。綠楊枝外九龍升。商量踏徧城東路。先把浮屠七級登。更闌女伴各招邀。八字尖西巷數條。走得三橋更思五。迎春橋轉玉梅橋。撥灰誰復認前塵。被酒黃墟屢欠伸。只有溪童偏識姓。廿三年上喚舟人。今宵無月有疎星。僻巷行來草乍青。挈得蔣三茶話去。洗心池上小方亭。燭龍七節影俱無。空有邗溪似畫圖。卻約十番諸子弟。孫家廳北戲於菟。夜久頻將玉笛催。白雲尖上冷徘徊。谿流到此先嗚咽。不見紅窗四扇開。轉憶輪臺樂事紆。蠻姬十隊合吹竽。三更人馬皆同色。杏子紅衫汗血駒。一條春港乍冰開。艇子如風去復來。看盡廟燈三十架。所思不到雨偏來。

兩邊簾幕影參差。方玉堂西月午時。只向最無人處走。芒屨先踏晏公祠。
日日衙齋燈火盈。一樓絲竹慶昇平。人生只有鄉園樂。萬里孤臣夢尙驚。

積雨簡趙兵備翼

三月不雨當如何。內河水涸連外河。吳船寸步行不過。斷港日日挑泥螺。忽然一雨卽五日。怒雷聲聲喧不歇。人言未蟄先啓蟄。一百廿日晴晝失。西鄰翁歌苦寒。昨見示束手三日書難觀。東鄰叟歌苦雨。隔巷招邀期亦阻。皇天有意寬災黎。米價不復能居奇。昨朝三十今廿五。只有菜把仍拖泥。米價稍平。惟蔬價甚昂。市沽常糲泥
出君不見龍嘴灘。舫盡走。豬婆灘。停不久。銜尾糧船出京口。

雨中得莊刺史忻榆林寄書言甘陝盜賊已盡喜而有作

閉門六晝雨如塵。枉卻江南乍好春。只有蟲書消永日。愁無蠟屐走西鄰。茅齋伴客餐乾糗。竈屋呼童爆溼薪。稍喜八行來遠道。早聞盜賊靖三秦。

廿四午後暫晴翌日復有雨意再柬趙兵備

乞得田間自在身。課晴課雨閱昏晨。天山尙夢三時雪。人海初平十丈塵。浪說戈頭能浙米。幾曾釜底乞分薪。燒燈市外雲如墨。辜負風光過早春。

東西街近屢經過。各有門迎八字河。此客半千殊未敵。買鄰百萬不爲多。書生絕檄曾磨盾。先生曾奉命參博文忠公

征補甸
軍事 逐客新疆偶荷戈。咫尺五湖烟水闊。得閒休負釣魚蓑。

二月二日獨行至城東北謁土神祠幾徧回途至玉梅橋觀社火作二首

巷南行已徧。巷北此重經。一陣社公雨。三層雲母屏。水心初漾白。柳眼乍回青。絕憶年時事。斜橋且暫停。土風今已變。社日勝元宵。草綠烏衣巷。花明朱雀橋。滿堤喧畫鼓。隔院喚錫簫。聊復行歌去。城東有酒標。花朝日乍晴。邀諸同人各攜一壺。一櫟至橫舟亭小飲。乘月乃歸。卽席成長句一首。

檐漏乍歇。谿風清。天放一角東南晴。同人宿約竟思踐。十里五里同遊行。橫舟亭枕大河側。五兩往往衝簾旌。布帆樓外出無數。去者如送來如迎。辛夷纔放梅未落。牆角老杏先敷榮。風光好處一亭嵌。綠柳裊裊空中縈。與花對面設高座。雄談四出聽者驚。烹蔬各復出新意。洗盞未了仍飛觥。沉思往事亦何幸。昨歲此日烏孫城。磨刀置頸久乃釋。賜以區脫全餘生。豈知此日對花飲。座上八客皆知名。溪光簾影恍如昨。一一逞態來檐楹。諸公莫更堅毋陣。頭上怪石危將傾。喧聲入樹鳥巢動。老鶻突出筵前鳴。酒酣各復繞廊步。衫袖拂處香何清。臨河亭子闊丈五。玦月未出波先明。嫣然修竹靜如笑。似與花朵爭高擎。嘿攜一盞向何處。苔滑石洞穿崢嶸。祝花生日并自壽。笑我一往饒深情。髯翁去後七百載。或者海外仍騎鯨。不然卽跨赤壁鶴。落落遊戲歸蓬瀛。文章在世匪偶爾。動與氣數關虛盈。矧公大節越流輩。詎止洛蜀稱耆英。零篇斷簡映天地。文采縱落留精誠。此詩此筆復繙讀。代有作者誰能爭。卽如硯池祇一泓。墨瀋尙

在光晶瑩。餘波沾漑及一世。清亦可濯塵中纓。眼前樂事最難得。何必擊筑兼吹笙。君不見。仙亦不羨茅初成。幻亦不學王方平。五侯鯖復懶入口。狎客詎識樓君卿。關心別有一二事。梁上語燕林間鶯。商量桃李及時放。牡丹勺藥況已萌。山陰清酒京口釀。誰其爲我儲百罌。此生萬事不可料。未審明歲將何營。興闌一笑出門去。攔客花影偏縱橫。

十三日同人復約至趙恭毅祠看杏花。回飲蔣太守熊昌宅賞玉蘭花作

五更枕上聞剝啄。瘦僕排門徑相速。爲言紅杏開半株。恭毅祠西一間屋。江鄉又饋刀鯽至。驚筍出籬剛一束。眼前光景期不負。遠拉髯吳俊臣及攏陸伯才。南華先生有加饌。出水鮓鱖悍雙目。潁州食指久已動。有客樽前避酖毒。廚娘洗手緩烹飪。脇若凝脂肪如玉。其餘蔬果七八種。糟漉蟹螯鹽漬肉。吾徒寧僅事口腹。冀欲昨詩今夜讀。況聞阿買近已殤。謂蔣驥昌通判昨殤一孫約至西齋慰歌哭。荒廳留客談益縱。茶味方回酒剛熟。雛僧又復攜花至。七尺亭亭樹如沐。爲花位置久乃妥。徑把牆西古苔剝。旁栽修竹或四五。白壁終須伴蒼藓。主人意欲傾家釀。一斗初完百壺續。參軍觴政東溼薪。作吏極良糾則酷。淋漓百盞急思避。口令瀾翻及詞曲。雖然盤樂亦當戒。雅興何須十分足。半圭春月縱未墮。已換兩番銀蠟燭。歸途南北更握手。天外濛濛柳絲綠。青錢三百倘復贏。明日定來看覆局。時太守與兩吳君角棋互有勝負

十五夜獨至雲谿步月

燕後花前春好。鷗邊竹外樓高。黃舒新柳一搦綠。響回波半篙。

可惜舊時風月。都銷一徑雲烟。倪姬閣仍臨水。即鸞。王家艇在誰邊。舊雲溪有渡舟。

十七日趙兵備翼蔣少府廷曜疊邀賞山查及杏花薄晚歸看燈作

山查花紅杏花白。兩地賞花日已夕。寬衣側帽行水東。卻好徑側來和風。趙家茶花甲城郭。赤繖當空日華薄。蔣家文杏種亦殊。昔時一株今兩株。闌干影裏分南北。花上晚霞皆五色。春花艷極乃不香。祇以顏色酣春光。風光只有花朝好。燕剪乍來蜂尙少。兩家觴客酒百壺。月出隔岸聞歡呼。樓臺一帶光凌亂。花影入波波亦絢。沿溪約略三兩家。歸客攀樹驚棲鴉。齋鐘初動客初醒。花外萬枝燈火影。

十八日戴村土人約食河豚因放舟詣其居并留宿

鱖鱖肪白土花斑。夙約凌晨出北關。卻到戴村渾半日。舵工云轉十三灣。牛宮斜對讀書堂。纔出堂扉使廣場。不種疎梅與桃李。門前十里菜花黃。

十九日偕陳刺史明善同詣亦園夜宿卽席賦贈

我初來亦園。主人耽賦詩。坐客劉文學邵文學屠刺史各各拈吟髭。我再來亦園。主人思彈冠。名士欲出

山笑殺蔣侍御與袁大令山中猿鶴拋離久。卅載復來園畔走。紅香亭暗綠閣傾。一壑一邱何所有。亦園

主人亦可憐。五十乞養囊無錢。折腰空拜道旁吏。歸骨已少城南田。窮州遠在風沙窟。自說歸裝僅冰雪。

賣刀買犢記前時。作字換鵝空此日。主人工書時賣字作活主人雖貧仍愛友。布置一筵談夜漏。園空月出棲鳥驚。醉折園花爲君壽。

月上攜酒花神祠下小飲

夢中欲去醒復還。門外流水聲潺潺。主人約客啓一關。天嬌十二排紅闌。神兮卻立玉作顏。佩影空際鳴珊瑚。仙人顏色皆渥丹。騎鶴無數雲頭看。案旁一人堆髻鬢。艷若桃李香吹蘭。格高意遠不可攀。幸昨識面緣非慳。乍離乍合彈指間。嫣然笑口合覺難。三十三徧春花殘。始知神仙在世亦不閒。況我木石心同頑。作詩題壁興亦闌。月午花朵偏班斲。放船出口越數灣。臥看一桁船頭山。

古香齋柏樹歌爲陳刺史賦

古香齋頭兩株柏。出土根同榦如劈。主人齋屋斜向東。一樹從南一從北。虬枝擊屋屋已破。拔地青蒼刺天黑。森然四角沉陰滿。日出當心不能赤。人間落落古丈夫。天半亭亭挺孤直。飽經雨露顏仍黝。不與凡姿競顏色。主人愛客客奇絕。三十年前住昕夕。客行握別樹始栽。樹竟幾番長過客。今來盤薄山齋內。樹與主人皆素識。摩挲撫樹對主人。可惜主人頭竟白。客今行周三萬里。樹亦添高廿餘尺。祁連山頭楠木滿。曾遜此株雄且特。頂平不待修雷斧。榦老偏能挽風力。枝經數折撐霄漢。根已二重透泉脈。因思復有三十年。樹欲扶天人入穴。沉吟不厭百回步。徒倚每聞三歎息。十圍櫟樹枝皆俯。半里松濤響誰敵。心空

早厭禽巢鬧。眼冷靜將人海閱。商量何物件歲寒。移得園東丈人石。

二十日微雨自徐墅七里步至潘墅買舟歸

徐墅及潘墅。弓背路七里。雨絲雖驟灑。客步亦徐起。買舟東岸下。柳外天始霽。紆徐路何曲。偃仄橋欲圮。行至西小湖。驚翻一雙鯉。

廿一日同人遊東嶽廟久憇禮斗樓

奇花初孕鶴初胎。曾約幽人一再來。要望紫雲飛過處。大家排手上層臺。長日悶從何處破。拈得紙燈繙夜課。三層樓上月當心。燕子不來人獨坐。

寒食已刻趙兵備翼招同趙比部繩男蔣太守熊昌莊宮允通敏陳大令賓劉宮贊種之小飲山茶花下

卽席賦贈

萬花紅處屐初停。勝踏橋南百草青。此樹果然同畫錦。故交先已若晨星。十餘年前曾同盧學士文弼才莊明府繩祖議此今皆下世奇恥著談龍錄。席間主人論及近時人詩議極平允屋廣仍餘旋馬廳。何幸洛中耆老會。始衰先得附頽齡。坐中客自八十年

僅五十餘

是日晚偶成

月到廿三剛半夜。客從二十便孤征。何因沙漠歸來早。重見江鄉節序更。蒸黍未嘗忘絕域。伊犁清明日以蒸黍饋客

賣錫先已報清明。籬桃乍放溪梅落。算在人間又一生。

莫折柳歌

清明日早起見人家皆折柳插門戶感而賦此

君不見道旁人。歲復歲。傷陽春。又不見道旁柳。年復年。摧客手。赭白馬。迎人歸。所種樹。皆成圍。門內人。門外樹。縱相離。無十步。客欲折。人已噴。人愛樹。花憐人。前花朝。後寒食。柳眼青。人鬢白。

清明日早起

一片迎神鼓。驚從枕上來。最憐新節序。須覓好池臺。鳥逐吟聲嘯。花同笑靨開。兒童漫相詫。廿載客初回。

予自己亥後至此始值里中清明

廿四日西堂獨坐

魏紫姚黃放尙遲。東風先落小桃枝。梨花白到銷魂處。只有雙雙鷓鴣知。

廿七日上城東浮屠遠望

偶踏城東路。孤僧爲煮茶。因登七層塔。看得一城花。

挂帆東北去。尙未越溪灣。只有吟眸闊。能看百里山。

廿八日莊徵君宇達招飲小山堂看花作

抱病經時履跡稀。忽傾家釀佐鮮肥。春從傍水朱門入。花繞扶風絳帳飛。雲外子規啼緩緩。夢中胡蝶影

依依。主人未是耽狂飲。憐我新拋短後衣。

初二日味辛齋看海棠作

無香色已冠香林。豔向亭坳屋角尋。隔岸綠先浮曉漲。對牀紅欲膩重衾。秋花祇作傷心草。蜀魄原疑共命禽。一曲闌干三尺影。幾回燒燭到更深。

三月三日攜酒出遊并上城東浮屠

風光眞已勝清明。杏葉扶疎柳葉輕。上已幾年悲遠客。先庚三日喜新晴。初一日晚積雨始晴書從薄洛

津邊至。是日得蔣仲先河南書酒向浮圖頂上傾。不是遇花偏痛飲。更誰佳節住江城。

顏大令崇頌寄示明楊忠愍公名印敬賦二律

不與頭俱碎。惟餘石一拳。百年宗社託三字姓名傳。入世心先剖。登壇肘偶懸。何須尋四角。應有怒蛟纏。卻憶明中葉。權奸盜國章。幾人關氣運。此石閱滄桑。尙有朱丹色。彌爭日月光。危塗如借佩。魍魅爾何藏。趙兵備詩來。嘲余牡丹未開。遽爾召客。因走筆用原韻作四百二十十字報之。并邀同作。

前日上已過。後日穀雨至。天公逞春容。伎倆已畢試。惟餘木勺藥。牆缺尙需次。含苞雖未吐。已復極姿致。春鶯翩然來。胡蝶各展翅。鄰家雙紫燕。日向闌楯伺。主人亦瞿然。此足助詩思。萬物取氣先。遲恐不及事。以口試問心。催花具當治。倘經三兩日。蜂蝶必大肆。成團舞花下。人反無位置。鄰翁顧相嘲。笑我先設施。

何如花放日。花下具筵熾。看花仍縱飲。仍拜主人賜。不知主人心。蓋亦有所自。流年如電掣。稍縱卽欲逝。前時餞辛夷。欲待月十四。十三風雨破。白壁忽捐棄。留花無別法。祇隕花下涕。因之悟消息。事事須早計。一觴兼一詠。庶不失交臂。諸公誠詩豪。亦可預先製。名篇早流播。不使有疵累。又聞此花開。神仙定游戲。以我廁其間。造物或者忌。何如先數日。看此欲開意。花光雖未破。先足嗅花氣。梨桃及棠杏。四美況兼備。縱然輸國色。紅白亦奇麗。午餘新月好。旭日又晴霽。譬如名姝來。先已媵姪娣。遲延至月望。花迺徧甲第。家家排花筵。勢必窮百味。而我先設餐。庶不晒粗糲。先生展然笑。此或自爲地。牡丹開十日。鶯粟又當替。藤花三兩架。紫艷半空蔽。芙渠與金粟。一一緣此例。主人詞已畢。客或笑詞費。仍須罰主人。別具餅一筭。謝花兼謝客。并助詩氣勢。花月皆十分。何妨再揚鱣。

趙兵備以十四日招客讌牡丹花下。先期以花朵絕小作詩解嘲。因用原韻復得五百八十字答之。

我家一叢花。發自月初九。將開及全放。自卯看至酉。凌晨攜臥具。月午佇尤久。今年比前年。花朵益濃厚。將傾十家產。約此數執友。忽然敲門來。遞到詩一首。千言何反覆。欲自飾怩忸。主人詞未畢。花已若蒙垢。我爲花歎息。轉向主人叩。解嘲旣前作。踵韻曷敢後。名花同主客。兩造愈紛糾。今來展詩讀。花乃開笑口。主人非憎花。其實乃惜酒。酒纔量升合。花敢大如斗。如能傾宿釀。日日約儕耦。更呼箏琵琶。花外小垂手。園亭雖未廣。水木足淵藪。池甯嫌屈曲。山不厭培塿。尋檐引芻尼。闢港貯蝌蚪。斜飛紅蛺蝶。倒挂綠鸚鵡。

花光既全舒。花蘊始盡剖。圓花與圓月。上下璧合紐。自然圍徑尺。益復致抖擻。酣春倚池臺。窺客入戶牖。黃紅紫墨綠。五色無不有。主人不負花。花肯主人負。今聞乃不然。花亦欲回話。年前春乍半。挈棹至虎阜。買花先靳價。遂不計美醜。歸同薪把束。益致種雜糅。譬如龍鳳姿。肯齒牛馬走。名雖市娉婷。實則計子母。花神暗中笑。此老亦奚取。如何不自責。反使花受咎。不見劉中允。種不見蔣通守。昌千金買傾國。臉杏臂則藕。錢刀惟不惜。貴在得幼婦。名花倚闌檻。靜女執箕帚。理固無不同。珍皆等瓊玖。主人讀新詩。唯唯又否否。花無纖介失。過總主人受。鼠姑開已徧。次欲到鴉舅。香丁紫瑣碎。菜甲黃蕾菩。翻反山櫻桃。旖旎水楊柳。蕪蘭成一頃。樹蕙又數畝。凡茲眼前景。均足佐樽卣。如思共晨夕。竝可約誰某。名花分向背。好友列左右。目成原不易。心賞亦非偶。闌干巡乍徧。牆角放偏陡。商量設几席。羅列到盃缶。肴寧侈水陸。圍自足筍韭。沿林採松蕈。搜徑覓竹飀。將雛雉登木。合隊魚麗鬪。山陰醅正熟。淮北麵須漉。一一炊溼薪。時時具乾糗。花前成勝賞。兼爲主人壽。我若醉百回。頽然亦成叟。

偶遊夾城菴題壁

夾城菴。風日好人欲往。橋先倒。牛羊多人跡少。百株花。一坡草。僧歸遲。燕來早。

十五夜小飲牡丹花下待崔三景侃不至

燕燕鶯鶯久作羣。牆頭入夜望如雲。得天獨厚開盈尺。與月同圓到十分。何處更容傾國見。此香先已上

樓聞誰憐露白燈紅夜。倚徧熏爐待鄂君。

劉中允種之齋頭紅牡丹盛開。招同人小集。卽席賦贈。

入座香風已四飛。姚黃魏紫認都非。神仙隊裏仍耽酒。富貴叢中獨賜緋。影共朱霞相激射。情於紅袖最因依。平泉十載纔開宴。怪底從前識面稀。

自無錫放舟至梅里謁泰伯祠

山城距山鄉。卅里挂帆往。土風何清淳。耕釣尙相讓。崇岡經數折。土殿亦軒敞。東西無雜木。列柏振清響。咫尺堯峯山。堯時日初上。

古藤歌

藤相傳爲宋蘇文忠公寓孫氏宅時手植。今宅歸湯方伯雄業。三月十九日。湯公子招同人宴集花下。卽席賦此。

建中靖國藤一條。剖半化作潛潭蛟。猶餘半榦臥偏穩。閱歲七百如崇朝。心空貌古枝尤禿。自砌及檐剛五曲。居停偶憶孫居士。移種竟傳蘇玉局。花時一巷吹古香。紫燕不敢棲雕梁。借公真氣方壽世。木理亦肖公文章。距花百步看乃足。高榦都遮出檐木。沿溪左右三十家。一半看花盡升屋。葛仙橋邊路四通。香氣已過橋欄東。半空紫繖益奇絕。千朵萬朵飛玲瓏。竟思遠挈鄆筒酒。祝樹與公同不朽。因花我復憶名

花香國亡來亦云久。藤側有香海棠一株亦文忠手植康熙中燬于火滁山釀水首重回。風味不減歐家梅。滁州醉翁亭側水上有歐陽文忠手植梅

廬陵幾載作滁守。公亦三度常州來。才名一代兼風義。落落寰中此師弟。詩狂久已上青天。幹古尙能蟠

大地。樓窗八扇正面花。欄楯屈曲枝丫杈。若將座客比花壽。細校歲月無多差。坐中十客年共計六百餘君不見紫藤

花開墨池漲。東坡洗硯池本在藤花側四十年前始移至藝舟亭古色斑爛各相抗。此花畢竟始何時。我欲東行咨石丈。

雲谿行送楊上舍元錫北遊

月出雲谿東。照見雲谿西。雲谿鯉魚亦成隊。生世不肯離雲谿。奈何溪邊人。屢放溪邊艇。我向溪頭望遠

行。布帆一一飛無影。君居雲溪已七世。三世及交情竝摯。君族祖衣文印曾及尊人敦復皆余故交矧君才筆勝昔人。使我論

交復傷逝。牡丹花紅繡毳綠。搖蕩溪光數間屋。家無長物殊可笑。祇有貯詩餘舊篋。城東別墅高數層。君家

有園在玉梅橋側俗名楊園老樹尙挂千年藤。昨因酒後一臨眺。君已薄醉難同登。最憐雲溪春。更向雲溪步。我屬溪

頭赤鯉魚。送君直到江干渡。

廿三日沈廣文元輅招飲餞春

首宿盤雖舊。櫻桃讌已新。是日始嘗櫻桃歌仍呼趙鬼。論早薄錢神。二句鑿括座中事半夜乍升月。五更猶是春。更欣時

雨足。歸路洗街塵。

屋後圃中鷺粟盛。開率成一律

日日衝簾柳絮風。送春已覺酒杯空。牆頭新月半鉤綠。屋後好花三畝紅。芳草更繁人跡外。艷陽都在鳥聲中。誰憐萬里烏孫道。錦樣韶光罩郭東。伊翠年來粟最盛。花叢視內地加倍。

蔣州守業晉寄天遠歸雲圖索題

江漢爭流處。茫茫鸚武洲。又隨鴻北去。直到海西頭。楚國萍如斗。天山月掛鉤。何因暫謀面。兩地訝同遊。余兩至楚中。一詣塞外。與君略同。而路較遠。又戊午年乞假歸。曾于吳門一識君。

萬里遙歸日。輪臺雨夜過。夢餘清淚落。天外斷雲多。此客情何逸。勞人鬢亦皤。披圖一惆悵。疑聽郢中歌。端五日偶成二首。卽柬趙兵備。

古人稱禁煙。不聞禁競渡。此如唐水嬉。亦若漢賜酺。一年惟數日。奔走及婦孺。書生縱憂俗。施設當有素。調劑得其中。貴在審時務。何因興大獄。幾至成黨錮。甘陵判南北。此事匪細故。流傳到絕域。衆口尙含怒。欲救舉國狂。惜哉謀已誤。余昨歲入嘉峪關。卽知里中因禁龍舟至興大獄。

白雲一曲溪。夢寐三十載。流觀眼底人。已苦乏同輩。今晨新雨霽。耕者釋耜耒。萬屐鏗有聲。紛然聚闐闐。榴花紅似火。村女滿頭戴。橋左幔已張。溪光迭晴晦。沿溪尤曲折。窗牖分向背。龍舟銜尾至。畫舫亦成隊。俗奢原可慮。幸此豐歲再。江魚頻入饌。山果隨所愛。水明樓上望。趙叟已先在。相應攜蒲觴。終日與晤對。雲溪競渡詞十二首。

雲溪如畫水如油。今歲歡場昨歲留。不肯更將風景煞。六龍城現四龍舟。
高處燈光礙月輪。軒窗無地着飛塵。生生視昔加三倍。樹上禽巢樹下人。
怒雷激電滿平川。艇子如風不及旋。齊向白雲尖上立。萬堆蠟屐雨聲圓。
傳來新調唱攤黃。分半吳姬束急裝。八角鼓完三弄笛。十番絃索一齊忙。
萬艇如梭集水隈。兩邊樓閣亦齊開。官河塞斷雙龍嘴。不管吳門水馬來。
吳船裝束近來工。南北窗櫺面面通。一晌夕陽紅不定。杏黃衫子立當風。
枇杷桃杏滿盤堆。遠有江鮮入饌來。屈指半旬交夏至。洞庭船不送楊梅。
河泥船好六倉寬。村女梳頭映水看。燕麥兔葵蠶豆莢。曉涼先向舵樓餐。
占得雲溪好景多。前門船向後門過。詩翁住處人能識。八字門臨八字河。
角黍堆盤酒滿壺。家家歡喜易新符。董龍社橘人猶指。更禁魚蝦入市無。
一句日日敞華筵。醉向東頭閣上眠。怪底月光飛不到。船船燈影接青天。
夢裏雲山一萬重。生還眞荷主恩濃。升平樂事誰能譜。我本江鄉識字農。

續競渡詞十首

紅板平橋次第過。未昏燈火塞城河。風光暗覺年來換。畫舫珠簾卜夜多。

趙兵備所居
前後皆枕溪

緩雲閣接甌香館。一帶紅欄間碧欄。正值白雲谿水漲。龍舟南北打招寬。

劉總鎮炬謙客極贊爰戲及之

鳴鉦日午說傳餐。鄉味偏驚水陸全。拋卻萬錢邀七客。將軍原合住樓船。
無舟可買上藍輿。祇覺今年興有餘。畫舫塞河人塞岸。更無隙地著禽魚。
郭東千尺水雲寬。老白龍來盡改觀。更向榜頭題御覽。天津城北昔迎鑾。
五色牙旗按五方。東西北廟蒸真香。更穿白馬司徒港。去謁金龍四大王。
水中彩鷁岸雲身。鉦鼓聲喧雜晚筵。同向赤烏橋外過。霓旌紅閃半天霞。
百尺濃雲水上開。嫩晴先已過黃霉。白須社長從頭說。二十年中第一回。
兩邊簾幕不須遮。日日輕橈泛水涯。笑煞隔河諸女伴。釵鈿質盡不歸家。
雲蓑雨笠剩閒身。夢後樓臺愴客神。依舊瑣窗飛燕剪。就中偏少賭茶人。
趙兵備以地理數事見訪因走筆奉答猥蒙長篇獎假并目爲行祕書因率成四截句酬之卽戲效其體
百篇君有連城壁。萬卷吾無紀事珠。一賦十年如製就。願同達載注三都。
尙慙正卯記醜博。敢說師丹老善忘。莫更一瓶緣舊例。次公猶恐醒而狂。
一巷東西本接連。數椽應愧卜居先。倘逢款戶求文者。大作家今在那邊。
三伏將臨九夏長。不辭揮汗走門坊。奚奴拍手還相笑。此兩閒人何大忙。

來詩欲緣借書之例問一事卽贈酒一瓶故戲及之

西谿漁隱歌爲會都轉燠賦

我家近南江。乃望北江北。桃花洲上三面山。久欲臨流築居宅。君家住西江。乃憶西湖西。西湖盡處一溪在。碧水蕩漾天低迷。我爲北江農。志不謀稻粱。江潮壁立一亭嵌。日校五雅兼三蒼。君爲西溪漁。意不在魴鯉。綠簑一領不肯穿。日日吟詩北窗裏。萬言落筆不得休。雕琢欲使前人愁。明堂左右列樽俎。武庫甲乙森戈矛。西溪漁隱詩六卷。派與西江亦殊判。沉思早抉天地奧。古色不供時世玩。竹西風月宦十年。珠履賓客盈三千。平山堂縱日登眺。清夢只落西溪邊。西溪近界江海中。溪上南北雙高峯。詩筒往往雜釣筒。得句時復驚蛟龍。才名京國誰能偶。輩行居然欲稱叟。西清東觀及外臺。十六年中一千首。歐陽戀穎湖。安石號半山。名流所在寓清興。好景何必皆鄉關。卽如西溪邊。咫尺接東海。拔地倚天詩筆在。潮生潮落爾許忙。漁弟漁兄欲誰待。君不見宮亭湖上源兩支。章水貢水流無時。西江宗派吾豈知。快意且讀西溪詩。

袁文學廷構移居載書圖

不惜兼金百計儲。牙籤時卷復時舒。一甌日詣袁居士。欲讀人間未見書。

委巷南頭與北頭。三遷我敢比前修。丹黃句讀依然在。時復傷心上小樓。

今從弟顯吉等尙居之。

中河橋側委巷中有小樓二楹。余少孤時母太宜人授經處也。

袁文學集明東林諸賢及黃石齋手札彙成長卷索題

不知我者不可言。知我何不書連篇。笈花委鬼正當路。舉筆欲下心憂煎。二周一魏書如此。悼歎人生不如死。求忠于孝古所云。忠節門仍生孝子。銅山先生起漳泉。萬言一疏人爭傳。明知末路不可挽。獨抱白日歸虞淵。蓼洲詩石齋集。筆底欲扶天地立。快論時歌復時泣。明家社屋已百年。紙上尙復生雲烟。君不見。季侯箋。孔時箋。

跋巨超上人足踏萬峯卷子

天下佳山水。南條與北條。我餐蔥嶺雪。目斷海門潮。是處皆飛錫。何峯合挂瓢。言從贊公宿。相與話迢遙。佛國鳩羅什。仙都梅子真。欲尋方外友。喜得箇中人。論已參禪悅。菴仍借隱淪。百篇心賞在。幽谷乍生春。十五日自京口渡江至焦山憇定慧寺作

西南行盡路萬千。返棹乃訪茲山巔。茲山風急不得上。幸有巨石攔洲前。山坳一石戴一屋。步縱曲折心安便。側身東望始寥廓。初日欲上潮無邊。心飛西海足東海。下瞰無地高惟天。放臣逐客罪應死。跬步懼有神拘牽。山靈怪我貌衰老。頭上雪色來祁連。齋廚粥飯客寮酒。彈指已近三十年。僧雛髮白野猿老。只有鶴頂紅逾鮮。四山松柏悉合抱。榦老盡起青蒼烟。少年事業百不就。削壁僅把新詩鐫。浮名在世究何益。回顧我已慙焦先。塵勞擾擾及一世。足繭欲乞空山眠。來歸萬里去萬里。祇覺豎亥堪隨肩。昨呼漁叟

興堅約。終老誓種江南田。

東升樓看日出

海日欲出海。先有鼉鼉鳴。青氣一綫來。潮與佛閣平。樓上客未眠。光景榻畔生。一杵京口鐘。先遞瓜州城。山半訪隱君洞

此山開何年。此客殊突兀。形骸生卽委。真性任汨沒。遂令巖樹上。飛鳥性皆拙。想見千載藤。猶纏隱君骨。觀音厓待月

我來觀音巖。月出斷厓口。棱棱紙聲碎。壁上蜥蜴走。海風吹幡竿。石冷坐偏久。夜半扶月歸。清輝膩人手。法界樓夜坐

龍界與人界。相去僅咫尺。夜半驅潮來。知憑夜叉力。枯僧樓上坐。親見髮如戟。復恐漁叟驚。懸燈照昏黑。山齋訪冒鳴。茹壽衢兩秀才并招小飲

書聲出戶蟲不鳴。山鬼一足深宵行。人頭魚身慣窺戶。見慣不怪心能平。昨來酷暑剛三夕。讀得好書盈一尺。鄰翁最喜文字交。夜半煮酒來相邀。

翠屏洲訪王秀才豫

此洲樓閣何參差。五十年前盡江水。廣陵城低波浪闊。藉此居然障東海。圍洲三面煙水空。正與北固成

屏風更殘日出東海東。照見一角樓窗紅。

六月二十一爲宋歐陽文忠公生日同人賦醉翁操以壽并邀同作卽呈會都轉燠

醉翁去後七百五十年。平山堂下仍復開賓筵。醉翁生日重理醉翁操。欲使醉翁心跡一一傳人間。醉翁

十年二十年。孤露蹤迹殊可憐。父書讀罷母垂涕。窆骨尙未營新阡。卅年四十年。醉翁作直臣。彝陵滁州

兩遷謫。身縱可屈眉仍伸。幾年作詞臣。幾年作循吏。治平至和中。遂爾登政地。醉翁文筆世莫儔。超軼六

代直接韓潮州。遠不識柳開。近不數穆修。醉翁志節尤崢嶸。手挈正士歸明廷。是時青苗免役新法尙未

行。洛黨蜀黨亦未交。相傾醉翁居朝端。一世仰作範。仁宗朝相不下數十人。公也獨參韓富范。醉翁勳業

又如此。一世如公幾人耳。醉翁吟。吟一篇。惜乏沈夫子。亦無杜彬琵琶皮作絃。醉翁操。操土風。此曲依約

來滁中。當時坡翁及涪翁。門生後進詩筆縱極工。若論文福一一皆輸公。昔者楊靈州。道公我前身。楊州守芳

燠。顧進士敏。恒扶拙所言。如此見所著梁溪筆記。公名如太山。詎敢追逸塵。惟餘一事薄相似。唇不掩齒厥效何其神。無事得謗

如前人。因之壽醉翁。醉翁或不噴。冷泠絲竹公賞音。逸興更或彈鳴琴。斜月欲墮長江濤。陳後山。謂東浦方伯

會南豐。詩名官爵皆可次醉翁。不見題襟館中來日集。都轉生辰後公二日荷榦荷葉依舊吹香風。滿堂樺燭漏盡

不須剪。正好來日直接朝曦紅。

寄酬會都轉見題荷戈集詩二首

記程一萬六千里。蔥嶺遙遙接蒜山。今日竹西歌吹地。又從吟榻夢陽關。
我于經閣論心久。君已詩壇駐足牢。絕似鄴中諸子會。主人吟比客吟豪。

附原贈作

曾燠

君得爲詩是國恩。長歌萬里入關門。笑他紹聖元符際。蘇軾文章禁不存。

滄江風雨一船高。招我松寥看海濤。

君時在焦山避暑擬往訪之

絕少行吟憔悴色。知君未肯著離騷。

題襟館贈鶴

空廊怪底步不前。五鶴一客隨吟肩。廊斜入屋勢尤窄。鶴步故緩人爭先。
回風開窗捲羅幕。客醉欲眠開擊柝。閒扉六扇夜不扃。窗裏客眠窗外鶴。

又贈柳

柳枝西北禽巢大。枝下砌蟲鳴百箇。三更星暗月欲來。蟬響復從枝上墮。
乍眠乍起天欲明。絲柳拂面人先醒。比肩豈獨同心友。添得三株水楊柳。

巨超偕棲霞僧慧超過訪喜賦

一僧江北去。復挈一僧來。把卷憶前度。論詩日幾回。病依筇作命。瘦與鶴同胎。
夜久生衣薄。相遲般若臺。月波臺夜坐。

萬聲聽不絕。人靜此樓頭。地缺洲三面。天空月一鉤。烏鴉爭噪暑。蟋蟀遽鳴秋。夜半龍吟水。寥寥衆響收。贈巨超慧超卽題二僧詩集

巨公居江心。慧公住江潏。詩筆如龍復如虎。句成寶氣燭九霄。龍虎鉢中頭盡俯。生平我喜七字詩。不可一世。人儘知。眼中無人絳方外。一任下士相嘲嗤。君看建業東來水。日夜滔滔欲歸海。二僧筆力可截江。端坐已受潮頭降。餘力更把焦山扛。巨公欲雲遊。慧公欲高臥。飛錫竝從天外墮。他日蓮臺孰高坐。

廿六日同人月波臺看潮

東南風轉急。全不見朝暾。雲欲沉江島。潮爭截海門。鬢因思舊白。眼覺讀碑昏。偶問滄桑事。枯僧幾個存。曾都轉燠及諸賓客約以廿六日至焦山見訪聞至瓜洲阻風二日尙不得渡作此戲柬

七日東南風不止。倒捲滄溟入揚子。順流一葉不得下。斷渡先從象山始。一客旣去不得來。一客留滯仍難回。時翠屏洲王卞二生過訪。一留象山。一留此。皆不得渡。松寥閣小一無事。飽看雪浪飛千堆。回頭卻憶瓜洲客。日日江樓看風色。別來幾日心眼空。清夢時與焦公通。君不見。波濤繞榻一萬重。正好日試登山筇。時叱檻外巡江龍。

酬慧超僧二首

因觀竹柏樓月。遠指高旻寺燈。三世佛前老衲。六朝山下詩僧。嬾到不參佛座。閒來唯理詩瓢。寰中五岳難住。海外三山見招。

廿八日同巨公慧公松寥閣早飯

山僧約客松花飯。破曉同登竹葉樓。正爾日長思就枕。未妨風急遽回舟。

始聞都轉等以阻風回舟

怕傳消息來三楚。

時楚中教匪尙未淨盡

閒理心情說十洲。淺醉更從窗外揖。午潮無際接天流。

將至消夏灣。在新塘守風晚值雷雨。

一湖水欲入船。一湖風欲揭竿。雨沉沉三十里。消夏灣在波底。

泊舟夾浦七夕

此夕新湖汊口。去年古浪城樓。笑看新月生處。曾到斜陽盡頭。

一叟自談衷曲。十年寄跡湖邊。衣食全家已足。瓜田盡處桑田。

夜攜酒至湖口望縹緲峯作

明月鋪不滿。全湖半生陰。東山飛鳥來。欲宿西山岑。一觴初完一觴續。倦向望湖橋上宿。潮生月落方賞。

心。天盡海飛空極目。

東南風急不得至西山。因回舟從伍浦抵東山作

白鷗入我夢。知我無窮意。憐茲眼前景。不作身後計。浮名生在死。卽休不見敗筆作冢糟成恥。石公咫尺。

不得進。回棹決向東山遊。

自新塘至伍浦溪行雜詩

溪水綠已窮。巖扃忽重閉。日華與山翠。層疊川上賦。前村爨煙好。穿此石林細。一徑山雨來。寥寥入秋氣。瓜花黃無端。被此一川綠。晨涼把竿好。閑坐此谿曲。人家隔坡水。路暗通石谷。日午攜榼來。人聲出山腹。兩村本一村。中有雲水界。溪流經數折。南北已分派。連宵風色緊。目送去帆快。人定波有聲。神魚望星拜。陸行富桑麻。水行富蒹葭。惟茲雲水鄉。不虞年歲儉。門前臨水路。鵝鴨數堪點。屈指白露交。秋禾又將斂。寄長興邢大令樹二首并柬李司馬廣芸

故人久宰長興邑。逐客新遊消夏灣。甚欲牽船遠相訪。斜陽影外浪如山。

年前寄我長牋好。

前寄實經說數條

逋峭文章擅一時。更憶南荒李司馬。同官同榜兩經師。

偶成

橫風兩日住江干。甕底桃花米已完。咫尺荒村無處糴。芟頭蓮實抵朝餐。溼雲堆裏漾龍鱗。一片荒寒景色新。猶勝玉門關外路。案頭無水動經旬。

伍浦夜泊

高士宅邊新月上。伍胥浦口落潮餘。多應念與雙峯結。未覺途經百里紆。別路更須尋馬蹟。此行端不爲鱸魚。宵殘燭跋攤書臥。靜聽松聲落枕虛。

五鼓自伍浦渡湖至東山

到來青歷歷。七十二峯巔。駭浪魚先拜。驚雷鳥已顛。水聲搖短夢。風色眯長年。昨夜前山雨。茫茫笠澤煙。喜晤程司理思樂

我借全湖水。來清百斛塵。故人吟骨健。遷客鬢絲新。感激樽前語。扶持難後身。廛旁營釣舫。久約共垂綸。憇東山道院

松杉千百株。小者僅及肩。歷盡松杉梢。一院開山巔。黃庭讀未完。丹爐火猶煎。道士識未來。勸我山頂眠。白雲有塔級。倘可升青天。

孫總戎廷璧坐上卽席賦贈二首并憶卞總戎九敘四川軍營孫爲庚辰科武探花。

萬頃洪濤艇似梭。相逢先唱定風波。山中共說支離叟。天上同魁甲乙科。話舊半皆淪宦海。謂畢宮係沉童少宰鳳三人溯源先到黃河。狂吟痛飲三更盡。衣上分明燭淚多。

獵獵營前秋雨斜。將軍筵上說龍沙。何曾一醉輪臺酒。余出關卽戒酒憶昨同乘博望槎。薄譴最憐家似夢。感恩新覺鬢添華。誰知萬里歸來客。依舊軍門聽曉笳。時卞在四川軍營効力已補都司矣

初九夜乘月自東山放舟至西山消夏灣宿荷花內

花光礙月舟不前。花氣薰客宵難眠。三更一棹破花出。客夢尙結花香邊。東山荷花十里長。千枝萬枝送

客忙花朵露滴波心涼。西山荷花一灣好。千枝萬枝迎客早。曙色上波花愈姣。楊梅樹繞荷花灣。深紫已落新紅殷。荷花香破夢亦闌。再轉已入仙人關。

梅花仙人歌爲程司理思樂賦

伯牙臺前花一山。君家梅山下。愛花人住梅花灣。無夢不與花相關。莫釐峯頭花萬樹。愛花人宦梅花渚。卻喜

官閑作花主。少年愛名花。花外無性情。離花一步不肯行。四十不復營功名。中年愛名花。花外少肝腸。一官雖卑意亦適。靜對花枝已忘食。世人不知君。笑君作花癡。君聞亦夷然。直受顧不辭。滿堂花開滿堂客。客或呼君作花癖。君聞若不聞。意亦良自得。一花初開詩一首。爲酌花枝亦呼酒。花神感君祝君壽。來歲居然七旬叟。花癡花癖君寧然。意與花有前生緣。君不見。梅花賦就三百篇。我今署作梅花仙。

消夏灣歌贈蔡博士九齡

全湖三萬頃。包此千仞山。湖流再轉已不見。山腹復有溪彎環。溪流迴與湖流異。湖水如油溪水膩。荷花世界夢亦香。淺白深紅炫天地。幽人家在花深處。正闢軒窗摘蓮蕊。蜻蜓舟小迓客回。半日醉客荷筒杯。荷筒杯。醉君酒。荷露烹茶沁人口。荷花中間結一樓。主人約客樓上頭。烹魚煮藕日尙早。手劈蓮房客先飽。

白雲

白雲濛濛空所依。傍天風吹之。偶落坡上。魚吹浪蹴。忽爾孤往。空中亭亭。儼若覆盎。成陰既溥。一世咸仰。新浴後。怡雲閣望縹緲峯。

不向前山策短筇。新涼浴後。且從容。幽窗正苦日西轉。陡落一支縹緲峯。雨花臺待同人不至。

凌晨發清興。瘦馬入絕壁。沿山石理鬪。雨點亦深黑。馬力忽已微。斜行憇危石。風雷莽成障。花雨渺無跡。卻啓西北扉。高臺望孤客。

四鼓自西山渡湖

挂席向何處。五更風色微。海雲天半立。山雨月中飛。百念籌關隴。全家理釣磯。東峯此歸去。魚鳥爾何依。

更生齋詩卷第四

滬濱消寒集

題孫文學韶行卷後卽送至浙江幕府

江左詞人最擅場。卷中亦復唱伊涼。通天臺下曾三過。怪底新篇壓沈郎。怨李恩牛意氣真。罪言草罷見經綸。能容一個真名士。足抵孤寒八百人。

重修水繪園卷子爲冒文學鳴作

記曾瀾勒與同龕。園中廢爲僧舍近始復。小劫誰從靜後參。檢點樓臺及魚鳥。風光依舊壓江南。

人物當年勝永和。時時觴詠雜笙歌。更闌偶向樓頭望。天上星無座客多。雙鬢愁同萬樹凋。閒窗話舊雨瀟瀟。桑田是處連滄海。門外時時起怒潮。雲郎去後小楊枝。檀板都吟絕妙詞。只有夜烏還記得。冒家園裏放燈時。

蔣斗燦童養媳呂貞女題詞

烏乎何辜。貞女生不見父兮。童養于蔣。又不及見姑。然貞女之幸兮。曾未結縭而已得數面其夫。何貞女之遇屯兮。守義二十五年而尙未及撫孤。我聞而心惻兮。感外氏之衰徂。緬前孫從表兄定安聘妻孫氏亦未嫁守貞年過五十

卒而後呂兮。顧兩見夫貞姝。倘貞女而有後兮。吾將代卹夫遺雛。生日自述

今朝柴門開。親故忽羣集。云將壽先生。共向草堂揖。我聞方猛悟。答禮恐不及。回頭語山妻。治具爾須急。嬌兒與孫子。禮數未嫻習。賓來盡歡喜。傳語競出入。先看具杯茗。繼復羅酒汁。仍愁翁欲醉。預向膝前立。長孫纔毀齒。口語已捷給。私語更五年。阿翁剛六十。

偶成

閒從里巷說新事。臥聽兒孫讀故書。不必更攜芒屨出。閉門紅日下階除。

喜張上舍舟過訪口占以贈

五回曾領江淮運。

君祖有衛籍。曾

策運糧艘五年。兩度同招楚蜀魂。

畢尚書沅。毛州守大瀛。與君最善。今先後歿于王事。

赤米白鹽家已破。朱旗元

甲陣猶屯。多愁自覺新詩少。老友今餘幾輩存。話到十三年上事。渚梅零落野雲昏。

辛酉年新正。在漢陽三山徑訪梅。握別。

黃主事丕烈祭書圖

古人飲食必祭始。何以讀書則不然。致身通顯不知報。是爲飲水忘其源。先生剗例實陳例。拜庚子日尊文宣。陳書萬卷復千卷。燭炬如挺香如椽。書神報君亦孔厚。往往獲一珍珠船。宋元精整本幾備。尤喜篇幅皆完全。先生嗜此若性命。快意不惜千金捐。搜羅書目所未採。中興館閣明文淵。樓名傳是閣天一。嗜

好亦恐無君專。就中精本祕不傳。緘以篋笥承之。氈偶逢識者一啓示。先掃几席除葷羶。何應寒具致汚軸。千載以上。嗤桓元君家舍宇本精潔。又少俗客相糾纏。焚香偶復展一卷。眼與明月光同圓。君不見。時逢朔望列一筵。不必牢豕須新鮮。胥谿菱芡石湖藕。一一皆可成加籩。書田雅與穀田等。報賽或可祈豐年。我曾借本細讐校。例得陪祭來筵前。虔誠拜罷共飲福。一醉欲乞書倉眠。

九月十三日越來谿見燕

寂寞漁莊款水扉。越來谿上月微微。何因燕子不歸去。卻向夜涼庭院飛。

自吳松江抵上海與友人夜話

吳淞江上路。乘月去迢迢。海氣全疑雨。天風不捲潮。夢餘頻悵望。雲外偶招邀。及此燒紅燭。層樓已半宵。

唐大令仲冕招飲網師園卽席賦贈

纔從識而便忘形。飯我城東水上亭。老友瘦真同野鶴。

謂王廣文芭孫

殘荷多尙比天星。百身未易酬恩遇。

時坐客詢

伊犁釋 回日月。一石偏教吐性靈。歸去且營耕釣好。得閒隴畔便橫經。

偶成爲陳太守廷慶賦

一幅蠻牋任屈伸。半鈎新月倍精神。關心幽鳥能窺客。過眼空花不惹塵。雲影去來傷往事。水光搖蕩識前身。悲秋宋玉支離甚。況復登臨送遠人。

過盡三春爛漫時。九秋籬落訂交遲。來猶背面誰曾見。去不回頭事可知。海上早應隨范蠡。洛中枉自賦陳思。黃庭一卷香千縷。半欲銷魂半自持。

顏魯公名印歌

一方石。千餘年。魯公名。誰所鑄。海中按龍鬪。龍骨更點星星老。蛟血地。老天荒。丹天滅。君不見。公名怪底。天子驚。河北二十四郡。僅一顏真卿。

哭蔣二尹齊耀

萬里歸來訪病身。劇憐面目已非真。余自伊犛歸訪君。君半面已毀。嘔心疾比龐眉客。懸腕書同透爪人。兩度悼亡形轉悴。一官瀕死志難伸。東山絲竹銷沉盡。垂老羊曇益愴神。余少受侍御舅氏知。每過居第。未嘗不揮淚也。

偶成

萬念俱空後。寥寥酒易醒。未能離世網。聊展度人經。路暗燈明壑。窗疎劍指星。書生爾何意。空自逞心靈。石湖訪范文穆祠分賦得石字

茲遊日已斜。霞采疊蒼赤。携茲書畫舫。償我山水癖。舟行十餘里。心境一開釋。杉藤凌澗紫。鷗鷺點波白。

濛濛湖一曲。落落嶺千尺。非無懷古意。風捲渺無迹。危登開士閣。幽轉范公宅。祠即文穆舊宅。斯人預機軸。時事

已逼窄。終焉感滄桑。渺爾念疇昔。憂時識希文。蹈海憶少伯。遭逢逮伊管。隱顯並賢哲。丈夫如有志。于世

匪無益。庶幾不朽名。勒此厓上石。

夢遊仙詩三十二首

屢讖瑤池鬢已蒼。偶從天半話滄桑。轆轤幸是仙人屨。踏盡紅雲到上方。
科頭跣足任天真。隨分燒香拜紫宸。卻喜近來蕭散甚。蓬壺管領謫仙人。
生世應居離恨天。愛從生後說生前。銅仙又復垂鉛淚。會面居然五百年。
白雲紅葉影參差。欲向前頭訪素知。拖得月華裙半幅。卻來波面立多時。
誰從天上號詞宗。淡寫新篇墨不濃。一朵絳雲環一字。笑他人世碧紗籠。
尋常每夜不呼燈。卻坐雲窗第二層。一卷道書時背誦。惜無人與證飛昇。
下弦殘月訂幽盟。青鳥傳來誤已成。幸有玉妃來世約。眼波回處定三生。
慣拈針線作生涯。剪得靈河一道斜。認取近來花樣好。青城雲氣赤城霞。
我識飛仙萼綠華。最憐秋鬢插春花。天田亦種人間果。一味香清愛木瓜。
繞砌菖蒲倚閣松。仙人眠處五雲濃。夢回報道高真過。先鎖閑門十二重。
出世情懷絕世姿。冥濛香氣散如絲。紅雲一瓣邀同坐。奇福難消是此時。
紫府新來品秩高。隨風上下騁輕軺。磨厓五岳都應徧。且復題名北斗杓。

屈曲房櫳宛轉風。一樓疑復住虛空。盡驅雞犬雲中去。獨敞銀屏待八公。
心思一串最瓏玲。更有長眉射眼青。欲筭人間未來事。滿盤珠借滿天星。
挈伴時來阿母家。采蓮艇子住雙娃。神仙一例嬌羞甚。不折天池並蒂花。
幽居隨處費提防。忽報飛星已入房。親到下方緣底事。借將弧矢禦天狼。
生來不假麝蘭薰。坐處偏離粉黛羣。欲灑天山萬年雪。罩他巫嶺不生雲。
住近天河水氣涼。萬株荷幹一方塘。蓮花蓮葉都嘗徧。不及仙人舌本香。
欲逃百劫避羣魔。天上誰知事更多。斲斷玉虹橋百尺。神仙從此絕經過。
桂樹扶疎月影涼。漫無情緒守吳剛。靈山採藥他年事。先與裁成出世裝。
雲漢西頭路幾叉。浮家真欲擬乘槎。兩三紅淚揮天末。都作人間異種花。
早住扶桑暮落棠。仙人遊戲本無方。忽然招手來天外。認得麻姑指爪長。
雲帔一步一徘徊。不分前途分手來。啖得荔枝三百顆。此時應向海南回。
日月雙丸剩半丸。東西海水亦齊乾。仙人一笑春風轉。萬劫偷從祕籍看。
王母池邊踏月回。羣花妒影不曾開。何應三百神仙侶。總學劉禎平視來。
巧笑仍含一種愁。見人常自不梳頭。朝來偶凭闌干望。自有神光照九州。

高居豈復有塵情。魔境應從道境生。惹得龍華先罷會。人間飛語謗雙成。
要從南粵達南閩。天漢東頭與問津。十度錦箋何處寄。倩他三百六魚鱗。
多應清福不曾修。逐浪來居羅刹洲。莫歎姻緣簿多錯。天孫亦復嫁牽牛。
朝正儀從最輝煌。龍虎前頭列隊忙。騎得鳳凰拳一足。笑他六六紫鴛鴦。
鋒車晨夕響如雷。結屋星辰頂上來。卻約下方人未到。天門一日走千回。
日正斜時月乍圓。紅林處處露珠懸。洪厓洞古誰能訪。只有修真謝自然。

趙兵備翼以所撰唐宋金七家詩話見示率跋三首

一事皆須持論平。古人非重我非輕。編成七輩三朝集。好到千秋萬世名。未免尊唐祧魏晉。欲將自郃例元明。塵羹土飯真拋卻。獨向毫端挾性情。

詩家別集已成林。一披沙與檢金。作者衆憐傳者少。前無古更後無今。法家例可平心斷。大府文非刺骨深。卷卷漫從空處想。就中多有指南鍼。

名流少壯氣難馴。老去應知識力真。七十五年纔定論。一千餘載幾傳人。殺青自可緣陳例。初白差難踵後塵。君意欲以查初白配作八家余固止之。只我更饒懷古癖。溯源先欲到周秦。余時亦作北江詩話第一卷泛論自屈宋起。

附和作

趙翼武進

詞客低昂本不平。品題間弄腐毫輕。但消白首無聊日。豈附青雲不朽名。老始識途輸早見。貧堪鑿壁借餘明。洪崖拍手從旁笑。猶是燈窗未了情。

何限紛紛著作林。揀來只剩幾銖金。論人且復先觀我。愛古仍須不薄今。耳食爭誇談娓娓。鼻參誰候息深深。錦機恐負遺山老。枉度鴛鴦舊繡針。

晚知甘苦擇言馴。一代風騷自有真。毫學我悲垂盡歲。大名君已必傳人。幸同禪窟參三昧。不笑元關隔一塵。從此國門縣呂覽。聽他辨舌騁儀秦。

偶成

愁多久已置形骸。恩重終須異輩儕。長慶集仍含諷諭。東方論敢雜談諧。銷兵乍喜流亡返。橫潦仍嫌燮理乖。何自近來恆斷肉。安貧聊學太常齋。

汪庶子學金以捉月圖屬題戲成三言詩一首

天上月。地上人。煙茫茫。隔十塵。隔十塵。欲捉月。馳風輪。風輪遲。月輪快。不得已。及天外。隔十塵。欲捉月。轉地輪。月輪寬。地輪小。不得已。出天表。隔十塵。欲捉月。借日輪。日輪紅。月輪白。不得已。兩相食。上弦月。捉不得。彎如弓。向人射。下弦月。捉不來。愁如眉。慘不開。十二三。十五六。圓疑環。白疑玉。玉與環。難把握。醉中客。總不知。時呼月。一問之。蓬萊山。作糟邱。捉不得。卽拍浮。滄溟水。作醇酒。捉不得。卽濡首。排千觴。列百樽。我

欲起爲解紛。仰明月呼先生。爲詩伯。爲星精。時或醉。時或醒。酒星暗。蟾月明。啓明落。長庚橫。萬萬古。傍月行。

曇陽仙觀題壁

生天成佛事皆真。二百年來記昔因。化鶴人歸寃已剖。釣鼈客到觀重新。觀爲州守鼈圖新建蟲魚篆尙留遺跡。麟

鳳洲先謁後塵。王鳳洲兄弟首先稱弟子畢竟傳疑由弟子。曇鸞枉說化前身。鳳洲作曇陽仙師傳未侈說師爲曇鸞師後身以致人疑

題明姜黃門藝圃諫草樓二圖

折檻朱雲氣已粗。時艱不敢作身圖。愚忠自欲回天地。臣罪原難保髮膚。滄海變來留隙壤。危樓築處傍

浮屠。敬亭山下春蕪滿。月黑愁聞杜宇呼。

吳梅村祠題壁

寂寞城南土一邱。桼梅零落水雲愁。生無木石填滄海。死有祠堂傍弇州。同谷七歌才愈老。集中有避難

秣陵一曲淚俱流。興亡忍話前朝事。江總歸來已白頭。

題王應宸太守洞庭泛月卷子

修月八千戶。常居天上頭。釣湖三萬縷。亦趁水東流。我覺飛仙好。時陪帝子遊。宵涼亦何事。嘯起岳陽樓。

苦愛蓬心叟。煙雲筆底濃。冥濛舟似蟻。活潑水如龍。欲到三層閣。仍携九節筇。天風忽然遞。嶽麓寺前鐘。

又歲寒宴坐圖

不知門外路。爾許雪霜深。客念此時寂。鐘聲昨夜沉。淡然忘世味。渺爾豁幽襟。在在都無著。空明此夜心。如公能幾輩。未許臥蓬蒿。終爲蒼生起。應知素望高。志猶營宇宙。跡暫脫塵囂。卽此坐忘處。天風響海濤。

題扇贈汪童子元爵

昌黎已序張童子。魏國先知員半千。他日蓬萊問家世。童子祖父已三世詞館四傳應號小神仙。

吳舫卽事

杜曲城南記最真。繁華悟後始尋春。蘭香仙去秋孃老。零落尊前見此人。水明樓上會羣芳。屑玉研珠費較量。折得一枝紅芍藥。鏡臺先欲贈花王。別友

謫下蓬萊又幾春。形骸疑假復疑真。天荒地老重相見。君是前身我後身。意外相逢是昨宵。可憐知復在明朝。十三夜月難連曉。魂斷溪南長短橋。

消寒第一會。萬大令承紀招集。吳舫聽寧福校書彈胡琵琶爲賦長句。時長至前一日

金閨城外人煙密。琵琶一聲萬聲絕。萬聲縱沸亦不聞。琵琶聲高壓四鄰。夕陽欲滅猶未滅。喚出團團海邊月。北風吹潮海上來。怪響迸入蛟龍堆。繁弦促節手不管。似有玉虬纏玉腕。神明矩度心不關。金鳳獨

翔金指環。一聲舒遲。一聲疾。霹靂出山天。乍裂大絃。展拓幺絃收。雲霞鋪空地欲浮。欲完未完聲一束。直立琵琶若鼉足。我行昆崙葱嶺二萬里。青氣漫漫障天起。非無胡琵琶。拉雜彈不已。妖姬十五如山魍。十指漆黑聲啾嘈。招來區脫彈數曲。帳外似虎天風號。烏孫戍客何曾久。意外生還感高厚。禽巢南枝獸邱首。百里遊行畏讒口。蒲帆無風向東走。忽復遭逢數良友。烹龍炰鳳爲我壽。更拉琵琶佐樽酒。金戈鐵馬音鏗鏘。奔厓裂石詞激昂。玉門關前天雨霜。天馬欲走蹄先僵。天山界畫陰與陽。日月影礙冰礪礪。曲終四坐慨以慷。似識遷客曾投荒。我爲琵琶歌。行酒復食炙。商婦當年已衰謝。何似茲樓起聲價。雲英翩翩未經嫁。拜起尊前貌閑暇。當時樂天淚墮琵琶下。我謂時平遷謫何足訝。況復經時卽蒙赦。南冠初除囚服卸。席地幕天無所藉。三百六日擇此最長夜。金烏玉兔光激射。二十八星環水榭。君不見樽前情淚何能灑。百歲浮生亦虛假。胷中之奇誰識者。出戶茫茫眺原野。有淚或向銅仙瀉。

消寒第二會汪庶子學金趣園座上追賦嘉慶戊午四月編輯婁東詩派成爲諸詩老設供建水陸道場用瑜伽薦度法并考生平行詣分上中下三壇別設閨秀一壇七日乃竣分賦得栢梁體一首

玲瓏水上飛千燈。東海壁月同時升。佛香妙處繙大乘。掃屋更結壇三層。一壇別設列采繒。雲鬢飛入皆鬢鬢。天人丰格不敢諷。淨名居士智力宏。佐以百六高功僧。婁東詞客繁名僞。恆河沙數量不勝。詩編大小束以絙。平生慧業此可徵。魂魄化去心神凝。光采尙若燔薪蒸。靈車鬼馬空際騰。一一彼岸祈同登。否

亦尙冀天衢昇。仙人心空鑒亦激。品第甲乙復品第甲乙殊兢兢。空中垂問空中鷹。忠如龍比孝閔曾。陳

雷朱范篤友朋。賈彪郭泰偕李膺。拄世風骨真稜稜。就中節義尤所矜。生可模楷沒豆登。列上上乘皆曰

應。其餘稍或寓勸懲。亦不以愛不以憎。原心略迹目匪營。大邦齊魯小杞鄆。州蓼隨絞邾薛滕。次等亦復

難加增。灌夫罵坐肆轢轆。樓護結客多依馮。曾中鱗甲手葛藤。甚或遇事全模稜。諫垣瑟縮嗤凍蠅。酷吏

伎猛同蒼鷹。亡身破家刺史澄。降胡負漢都尉陵。品列下下無能陞。知人論世最足憑。不以文筆相誇凌。

大弦稍緩幺絃掎。筆法直似朱絲繩。定論無用參疑丞。此邦前代尤峻嶒。後先七子稱代興。兩王荆石相

尙書事業世所稱。各有祠廟羅肴膾。迪功集若雲霞烝。日觀噦鳳天池鵬。梅村祭酒緒復承。此道亦屬三折

肱。歷年二百留雲祢。流光疾若矢射棚。琅邪太原壇坵仍。品題直到驢與驥。語簡而當爭鈔謄。我于彼法

習未曾。服此論斷非僂僂。忠賢奸佞各列棚。竟若二水分淄澠。學仙學佛縱不能。何必苦判溝與塍。山雲

欲凍海欲冰。萬丈雪霰愁難凌。歸裝幸有十束綾。敬錄一本隨行勝。

消寒第三會。王孝廉履荃。胡明經金誥。邀遊樂郊園。因出婁東十老圖。索題。

十老爲王育。字石隱。年八十。陸羲賓。字素朴。年七十一。宋龍。字子猶。年六十四。郁法。字儀臣。年六十五。

顧士璉。字殷重。年六十四。盛敬。字聖傳。年六十二。陸世儀。字道威。年六十一。江士詔。字虞九。年六十。陳

瑚。字言夏。年五十九。王撰。字異公。年五十。皆婁上明末隱君子也。

十人慘慘荒江潯。時歌時哭天爲陰。朝無食案夜乏衾。尙披朱履行空林。沈思古昔淚雨淋。往者不作何況今。魯連既向滄海蹈。屈子又復湘江沉。田光刎頸藺宏脆。漸離矐目豫讓瘖。吹簫吳市亦時有。擊鼓河岸誰能尋。囊中止剩伯倫錘。海上自拊成連琴。龔生未授新祭酒。伏勝尙屬秦儒林。以之相較盡不愧。餘子未足披深襟。歸迂顧怪在咫尺。庶可與爾稱同心。

消寒第四會汪刺史廷昉座上賦南園古梅歌梅爲前明王文肅公手植名一隻瘦鶴

一雙鳳去不回。一隻鶴翩然來。

城北卽雙鳳鎮

翩然下啄莓與苔。渺爾化作羅浮梅。羅浮仙夢何時醒。幻作梅花

尙朱頂。三生落落出世姿。七尺亭亭照波影。不飛不鳴作高格。四出枝猶排逸翮。亭空月冷露欲零。仙客

欲騎騎不得。百餘年來丁令威。游戲尙復時來歸。人民城郭縱非是。尙認一樹衝寒開。幽人幾日園南住。

香氣橫飛海東路。滄溟今已作桑田。

斐河口今壘長海沙遂至淤塞

此樹應須憬然悟。園林之主先後殊。昔者太保今尙

書。南園近爲畢秋帆尙書購得以居甥沈懋師

圍棋賭墅偶然得。瘦骨尙欲凌高株。研薌居士開賓閣。邀客詠梅如詠鶴。長身

安得居樊籠。復恐化鶴飛橫空。

消寒第五集田大令鈞邀集官廨卽爲題荆樹山房圖卷子

荆樹山房爲大令六世祖明萍鄉令□□所建嘉慶三年錢唐黃司馬易爲補圖

田家集在何處。門前清濟會濁河。百世流傳紫荆樹。紫荆樹老花愈多。四出不復分枝柯。尋根旣悟一本

義攀樹時作同心歌。我願兄弟心。化作此樹陰。祥風甘雨萃一林。三冬三夏不使嚴霜烈日交相侵。仍願手足誼。化作此花蒂。千枝百枝同一氣。花葉雖繁枝不替。李家花萼樓。馮家棠棣碑。不及君家此樹好顏色。千古萬古名猶垂。山房三間下有池。容易得值花開時。花前盈盈酒滿卮。既不識。尺布斗粟三字辭。亦不聽。然其煮豆七步詩。君家此樹真堪愛。大令遠君剛六代。一門草木皆異常。茱萸不吟護樹背。龔梧生黃小松。爲君作圖作記皆極工。君不見。紫荊花。花色異。絕愛君家好昆季。六世相傳幾循吏。更覓甘棠栽隙地。

消寒第六會汪公子彥國招集復初齋觀王石谷繪山水直幅

畫係石谷贈公子七世祖明處士汪溥溥亦工畫爲婁東第一手

我行徧天下。卻愛黔中山。黔中山勢盡壁立。出地萬仞無彎環。南峯升雲北峯月。畫裏溪山亦奇絕。靈泉破空山石裂。飛出千年萬年雪。崖窮路古林光倩。斷壑奔灘鬼神現。林花對客纔一笑。山鳥窺人剛半面。洞門怪響七尺筇。奇古似是商山翁。商山翁居海曲。得意時歌復時哭。地老天荒一間屋。滄浪之水清濯足。鶉鷓鷗茲與同浴。放艇時來玉峯麓。森然非松亦非竹。植立門前聞剝啄。主人開戶喜不速。邀坐茅檐背同曝。忽然一筆寫不足。肌膚如山骨如玉。狂叫自呼王石谷。我題此畫亦非偶。二百年前倘良友。畫中蕭疎兩閒叟。著罷枯碁偶垂手。瞥見洪厓拍肩否。

王石谷自題有洪厓拍肩之語

山中古洞如敲開。兩翁曳杖還能來。消

寒集上醉幾回。大笑手覆三千杯。

消寒第七集唐明府仲冕招集吳縣倉廩觀唐六如畫馬

唐生畫馬如畫鶴。仙骨稜稜難捉摸。不識人間有鬚絡。唐生畫馬如畫人。霞采奕奕光曠神。氣軼天半心難馴。唐生本是神仙謫。畫馬亦與龍鱗匹。眼空千里萬里程。一點飛從草頭黑。蹄高四尺尾徑尺。全力都從尾間出。頭肩背腹鬣蹀膝。大氣回環如一筆。蠻靴烏帽衫落拓。此客我疑孫伯樂。不然何以神采騰。氣磅礴。我曾行經大宛兼烏孫。枕戈萬里求絕塵。生還豈意復相值。雪夜對此開芳樽。六如畫品陶山詩。落筆往往饒精思。前生不是趙承旨。或者卽爲李伯時。君不見。旄頭星尙照巴蜀。眼急捷書來不速。十萬驂騑競馳逐。饑火燒心尾毛禿。何如此馬真有福。飛行限以尺一幅。低首且食太倉粟。

消寒第八集孫兵備星衍邀同人泛舟至永昌鎮訪孫武大家率成四首

初日甫欲升。照我出東郭。巫門已迷離。何況冢廓落。言尋永昌鎮。十里路初拓。英雄骨未朽。其上已耕鑿。雖然巢冢鵠。鷹隼不敢搏。繙罷越絕書。酸風下懸閣。

伍胥貢奇士。本欲爲國謀。寥寥一寸心。亦報身家讐。要離與專諸。詎與公等儔。蕭蕭吳宮中。頸血五步流。遂令姑胥臺。濃春修成秋。平原不知兵。亦斬笑者頭。

生齊而仕吳。位視客卿例。如何蓋世才。乃用作兒戲。兵鋒纔一試。已取鄢郢地。嗟嗟甬東叟。不及盡奇計。至今十三篇。海內悉衣被。

荒墳極十頃。上有柏樹根。高碑止留跡。文字已不存。茫茫今古殊。地尙名孫墩。百步絕采樵。沒世若有神。千年尙思鄉。魂登望齊門。

消寒第九集臘八日李廉使廷敬招同人至虎阜憩梅花書屋看黃梅作

十步亘一閣。五步橫一臺。藐姑仙人尙未來。風信先已催黃梅。門開稜稜石千尺。徑險最宜雙蠟屐。小樓開處三面花。花下屋古如浮槎。闌干東西屋前後。不及捲簾香已透。紅紅白白不並時。南枝北枝開故遲。維餘寒影互激射。凍蕊落葉光參差。黃蜂千頭綴枝冷。只惜南園蝶無影。紆千山雀時一雙。噪得遊人發深警。日當臘八月上弦。樓上兩兩排華筵。飲中八客疑八仙。是日同在詞館者共有八人不飲我欲花前眠。花光旣分飛。燈影亦交錯。君不見談深不覺冬日促。幾樹夕陽黃不落。

古會晤詞

回頭卽相思。對面忽無語。妾身雖堅貞。妾意已相許。妾如團欒月無缺。儂似曉星常逐月。升天入地影不離。何必更判雲與泥。

古訣別詞

紫騮不會歸。青驄不會去。同行複道中。意外復相遇。黃梅一株香未折。花底忍寒來訣別。暗影朦朧啓北扉。巖霜正白城頭月。

邗溪步月

空外月華直。幽人此際來。寒梅三兩樹。並影一齊開。

臘月十九日卷施閣邀同人爲宋蘇文忠公生日設祀作

東坡謫南海。我謫西海頭。東坡更三歲。尙未離儋州。我頃荷戈來。僅止三月留。我歸正值黃流漲。海外奇花未全放。天山六月汗不流。冰雪千層萬層障。竭來半載荒江沚。一念感恩先欲死。江田時陸復時沉。自歎浮生亦如此。年殘百事如蝟毛。歲未全稔民仍勞。憶公更憶初度日。置酒遠復邀朋曹。初陽離離開竹屋。黃白種梅香乍馥。遠行萬里今甫歸。濯足卷施一隅谷。君不見。坐中七客鬢皆斑。難得人閒歲亦閒。同獻樽前一杯酒。祝公生日我生還。

凌同年廷堪以其族曾祖明侍御□□遺札屬題率賦一首

一紙留遺墨。千秋識蓋臣。更因懸腕疾。彌覺剖心真。臣節終橫草。朝端尙厝薪。傷心江總輩。文采竟亡陳。借月歌爲借月上人賦

出門卽看山。閉門卽抱膝。上人于世何所需。祇借天空一瓢月。有時欲閒吟。一瓢月在心。空濛百斛光。先與祛煩襟。有時欲說法。一瓢月在頰。靈明百琲珠。如看瀉行篋。空空相色非非想。瓢月時時復盈掌。離鄉忽欲念鄉山。天姥天台或長往。去年住城東。看此瓢月生。巽宮樓前燈影明。今年住城北。看此瓢月蝕。天

王堂中香炷熄。僧既不還俗。月亦不上天。假而不歸凡幾年。聞說塵劫歷百年。經千天邊之月時或缺。月在一瓢光不滅。

許上舍汝原觀濤圖

避人何敢學乘桴。東下滄溟住得無。轉眼忽憐塵世小。一杯海水一葫蘆。三千里路客何久。十八家村住亦難。我欲與君同卜築。城南陽羨好溪山。

題畫

峯峯嵐氣誰能辨。一色采雲分一面。山形正闕西北峯。卻好海霞生片片。山深六月徹骨涼。世事不到三間堂。回厓偶爾透日光。水流花開天地忙。石壇中間棋局具。五客入門饒逸趣。纔完一局已卅年。騎鹿公然上天去。

荅友人問近狀

門前三萬六千頃。架上二千四百年。曾次近來無一事。釣竿纔放枕書眠。

跋唐豐溪處士呂從慶詩集後

處士本大梁人。以唐廣明元年避黃巢之亂至歙。又自歙移旌德之豐溪。遂家焉。處士卒時年已九十。七。自題其墓碣云。唐詩人豐溪漁叟之墓。時已屆石晉天福中。蓋處士之不忘唐如此。自後遂世居豐

溪。迄今已九百餘年。子姓繁衍。多至數千家。余來主洋川書院。其末孫璽與培皆從余游。近復從零縑斷碣中。搜羅處士之詩。并前所刊。共得四十五首。乞余序之。因并繫以詩。

君詩四十有五篇。流傳九百十六年。豐溪自此占居籍。百世尙識開封遷。人丁至萬戶。至千。前後南北園墳田。清明歲歲上先冢。十里以外聞香煙。千年家法堪則倣。不用西方化人教。牲牢奠後布路回。墳頭從不飛紙灰。君不見。司空表聖羅昭諫。唐末英英義聲見。詩人豈藉詩句傳。大節所在尤昭然。豐溪處士生晚唐。末路乃值晉與梁。時噲時輟。心內傷。醉後自比陶柴桑。烏衣山。王官峪。糾嶺柵峯同巒。九原數子。如可作。愧煞陵陽杜荀鶴。

友人貽所知集見卷中錄先君子詩頗多敬讀一過感賦

親承色笑猶如昨。孤露餘生五十秋。夢好尙能依膝下。愁多時復上眉頭。傳家舊業詩千首。卜築新塘土一抔。便種梅花滿墳屋。他時地下鎮從遊。

